

FAASOLOGA MATAUPU - VASEGA AMATA 2015

MANATU AOA O LE TAUSAGA: O LE ATUA MA SUIGA

FEPUARI: O LE LALOLAGI MATAGOFIE (Suiga matagofie na faia e le Atua)

8	O le malamalama ma le pouliuli (ASO SA O TUPULAGA)	Kenese 1: 1 – 5
15	Na faia e le Atua le tagata	Kenese 1: 7 - 8
22	O le nuanua o le Alofa	Kenese 9: 8 - 17

MATI: O FAATAOTO A IESU (Suiga i olaga ma mafaufauga o tagata)

1	Saito ma le Titania	Mataio 13: 24 - 29
8	O Taleni	Mataio 25: 14 - 30
15	O le mauoa ma le tagata mativa	Luka 16: 19 - 26
22	Taupou e toasefulu	Mataio 25: 1 - 13
29	O le malaga faa-tupu a Iesu (ASO SA O LE LAUPAMA)	Mareko 11: 1 – 10

APERILA: O LE OLA FOU (Suiga mai le oti i le ola, mai le faanoanoa i le fiafia)

5	Ua toetu Iesu (ASO SA O LE TOETU)	Luka 24: 1 – 12
12	Ua toe faaolaina Lasalo mai le tuugamau	Ioane 11: 30 - 44
19	Ua toe ola le afafine o Iairo	Mareko 5: 35 - 43
26	O le tama na faaolaina e Iesu	Luka 7: 11 - 17

ME: O TINA LOTO TETELE (Suiga mai le fefe ma le popole i le loto tele)

3	O Iokapeta le tinā o Mose	Esoto 2: 1 - 10
10	Raava ma tagata Israelu e toalua (ASO SA O TINĀ)	Iosua 2: 1 – 19
31	Ua tali le Atua iā Hana	1 Samuelu 1: 1 – 20

IUNI: O SUIGA O LE SIOSIOMAGA O LE TAGATA

(Mai le taimi o le Tusi Paia, ma ona po

nei)

7	O fale sa nonofo ai	Mareko 2: 1 - 5
14	Ua tietie Palaamo i le asini	Numera 22: 21 – 31
21	O Ofutau	1 Samuelu 17: 4 - 7
28	O le Ola Tapuai	Ioane 4: 19 - 24

IULAI: SUIGA E ALA I LE FAAMALŌLŌGA
(Suiga mai le ma'i i le malosi ma le maloloina)

5	Ua faasa'o le tua o le fafine na faano'uno'u	Luka 13: 10 - 13
12	O le tama sa i ai temoni	Luka 8: 26 - 39
19	O ai na pa'i iā Iesu?	Luka 8: 43 - 48
26	O le ta'ita'i 'au faatuatua tele	Luka 7: 1 - 10

AOKUSO: O MANU FOI O AVE FEAU A LE ATUA

2	O Saulo	1 Samuelu 9: 15 - 19
9	O Solomona (ASO SA O TAMĀ)	1 Tupu 3: 7 - 15
16	O Iopu	Iopu 2: 7 - 11
23	O Ieremia	Ieremia 1: 1 - 9
30	O Setefano	Galuega 7: 51 - 60

SETEMA: SUIGA INA UA SALAMŌ

6	O le mamoe e tasi na leiloa	Luka 15: 3 - 7
13	O le tama ua salamō faamaoni	Luka 15: 11 - 31
20	Ua salamō Sakaio	Luka 19: 1 - 10
27	Le lepela loto faafetai	Luka 17: 11 - 19

OKETOPA: O SUIGA UA AUMAIA E TAMAITI

4	Tauloto mo tamaiti	
11	Lotu Tamaiti	
18	Malologa o le Lotu Tamaiti	
25	O Iesu o le uo a tamaiti	Mareko 10: 13-16

NOVEMA: O LE OLA FOA'I (Suiga mai le manatu faapito i le loto alofa)

1	Faasoā Faale-Atua	1 Samuelu 30: 21 - 25
8	O le foa'i a Iosefa le Aremataia	Mataio 27: 55 - 60
15	O le foa'i alofa i ē agaleaga mai	2 Tupu 6: 14 - 23
22	O le foa'i a le fafine Sunema	2 Tupu 4: 8 - 13
29	O Elia ma le fafine Sarefata (ASO SA O LE ATEVENI)	1 Tupu 17: 8 - 16

TESEMA: O LE KERISIMASI (Suiga mai le pogisa i le malamalama)

6	O le po pogisa ma le malulu	Luka 2: 1-15
13	Le malamalama o le fale o manu	Mataio 2: 1-12

**MANATU TAIALA O FEPUARI: O LE LALOLAGI MATAGOFIE
(Suiga matagofie na faia e le Atua)**

O le manatu aoao o lenei tausaga 2015, “O LE ATUA MA SUIGA.” O le manatu o lo o fia faamamafaina i lenei masina o Fepuari, “O LE LALOLAGI MATAGOFIE” O le faamoemoe maualuga, ina ia a’oa’oina ma malamalama lelei le fanau i fuafuaga mamana a le Atua, na Ia fuafuaina ai le faiga o le lalolagi ina ia lelei ma matagofie, ina ia tatou ola fialia ai.

**ASO SA: 8 FEPUARI 2015
(ASO SA O TUPULAGA)**

MATAUPU: O LE MALAMALAMA MA LE POULIULI

SINI: Ia a’oa’o le vasega ina ia malamalama, o le Atua na faia le malamalama ma le pouliuli.

TUSI FAITAU: Kenese 1: 1 – 5 (mo le Faiaoga)
Kenese 1: 3 (mo le Vasega)

“Ua fetalai mai le Atua, Ia malamalama, ona malamalama ai lea.”

FESOASOANI MO FAIAOGA:

A o le’i faia le lalolagi ma mea uma ua tumu ai, sa i ai le Atua. O le Atua na Ia foafoa mea uma ua faia.

O le lalolagi, sa leai se mea na i ai. Sa soona nunumi ma ufitia uma le moana i le pouliuli. O lea na fai ai e le Atua, le lalolagi i lona matagofie ua i ai nei. Na ona fetalai atu lava o le Atua ia malamalama, ona malamalama uma ai lea o le lalolagi. Ua silasila atu le Atua i le malamalama, ua lelei. Ona tuu eseese ai lea e le Atua o le malamalama ma le pouliuli.

Ua faaigoa e le Atua le malamalama o le ao, a o le pouliuli o le po. Na faia e le Atua le malamalama ma le pouliuli i le aso muamua na faia ai e le Atua le lalolagi.

GALUEGA FAATINO:

Valivaligā Ata: Ia saunia e lau susuga i le Faiaoga ni pepa ma ni peni vali e tufa i le vasega e galulue ai i foliga o le lalolagi sa i ai a o le’i faia le malamalama.

PESE: This little light of mine.

A’OA’OGA:

1. Na faia e le Atua le malamalama ma le pouliuli.

ASO SA: 15 FEPUARI 2015

MATAUPU: NA FAIA E LE ATUA LE TAGATA

SINI: Ia a’oa’o le vasega ina ia malamalama, na faia e le Atua le tagata.

TUSI FAITAU: Kenese 2: 7 – 8 (mo le Faiaoga)
Kenese 2: 7 (mo le Vasega)

“Ona faia lea e le Alii le Atua o le tagata i le efuefu o le eleele, ma ua manava i ona pogaiisu o le manava ola; ona avea ai lea o le tagata ma tagata ola.”

FESOASOANI MO FAIAOGA:

O galuega a le Atua, na taualuga lava i le faia o le tagata. O le tagata, na faia lava i le faatusa o le Atua. Na faia le tagata ina ia pule i mea uma na faia e le Atua i le lalolagi. Na faia foi ina ia na tausia lelei le foafoaga atoa.

Na faia le tagata e le Atua i le efuefu o le eleele, ma ua mānava i ona pogaiisu o le mānava ola, ona avea ai lea o le tagata ma tagata ola. Ona tuuina lea e le Atua o le tagata i le faatoaga na ia faia i Etena.

GALUEGA FAATINO:

Valivaligā Ata: Ia fai ni kopi o le ata valivali ua saunia e tufa i le vasega e galulue ai.

PESE: Na faia e le Atua mauga maualuluga
God made the mountains high.

A’OA’OGA:

1. Na faia e le Atua le tagata i lona faatusa.

ASO SA: 22 FEPUARI 2015

MATAUPU: O LE NUANUA O LE ALOFA

SINI: Ia a'oa'o le vasega ina ia malamalama i le uiga o le nuanua.

TUSI FAITAU: Kenese 9: 8 – 17 (mo le Faiaoga)
Kenese 9: 13 (mo le Vasega)

“Ua ou tuuina la'u nuanua i le ao, e fai ma faailoga o le feagaiga a le lalolagi ma a'u.”

FESOASOANI MO FAIAOGA:

Ina ua uma le lolo, ona finagalo lea o le Atua, o le a lē toe i ai lava se lolo e oo mai e faaumatia ai le lalolagi.

Ua fetalai mai le Atua i lana auauna o Noa, “Faauta, o le a ou faatumauina la'u feagaiga ma outou, ma a outou fanau, ma meaola uma o iā te outou. O le a lē toe i ai lava se lolo e faaumatia ai le lalolagi. Ou te tuuina atu la'u nuanua i le ao, e fai ma faailoga o le feagaiga a le lalolagi ma a'u.”

Ioe, o le nuanua, o le faailoga o le alofa o le Atua i le lalolagi. O taimi uma lava e vaaia ai le nuanua i le lagi, ona tatou manatua lea o le alofa o le Atua, ma le feagaiga na Ia faia.

GALUEGA FAATINO:

Valivaligā Ata: Ia fai ni kopi o le ata ua saunia e tufa i le vasega e galulue ai.

PESE: O le Atua e alofa ia te a'u.

A'OA'OGA:

1. Na faia e le Atua le nuanua.
2. O le nuanua, o le faailoga o le alofa o le Atua ia i tatou.

MANATU TAIALA O MATI:

O FAATAOTO A IESU

O le manatu taiala o lenei masina, o lo o fa'aaogaina ai tala faatusa o le foafoaga, p o o mea na faia e le Atua. E faapupulaina ma faamalamalamaina i taimaiti, o le uiga o a'oa'oga ma fetalaiga a Iesu, o ala tonu ia, e ao ona savavali ma ola ai.

ASO SA: 1 MATI 2015

MATAUPU: SAITO MA LE TITANIA

SINI: Ia a'oa'o le vasega ina ia malamalama o le faataoto i le saito ma le titania, e faatatau i amio lelei, ma amio lē lelei o lo o tatou faia.

TUSI FAITAU: Mataio 13: 24 – 29 (mo le Faiaoga)
Mataio 13: 26 (mo le vasega)

“Ua totogo a'e le saito, ma fua mai, ona iloa ai lea o le titania”

FESOASOANI MO LE FAIAOGA:

O le saito, o se laau taua ma aoga mo le tagata. O le titania e leai sona aoga i le tagata. E foliga tutusa laau nei e lua. A o'o i le taimi e fua mai ai, o iina e iloa ai o la eseesega, ona o la fua ua vaaia. A oo foi ina matua le saito e fa'aaoga e tagata mo meaai, a'o le titania e matua leai se aoga mo le tagata. Mafuaaga lena sa fetalai ai Iesu i e galulue, ia liaina le titania ma susunu, a o le saito ia faaputu i le fale saito.

Ioe tamaiti, e fiafia Iesu pe afai tatou te amio lelei. O le amio lelei, e aofia ai le usita'i, faalogo, onosai, loto maualalo, fa'aaloalo, loto fesoasoani, agamalu ma e fiafia foi e alu i le lotu ma le aoga Aso Sa. Ia fua mai i tatou ia pei o le saito, ae aua le pei o le titania.

GALUEGA FAATINO:

1. Ia fa'aali i le vasega ata o le saito ma le titania ona valivali lea o le ata lona lua.

PESE: Faalogo ma usita'i

A'OA'OGA:

1. O le saito o le laau lelei a o le titania o le laau leaga.
2. E fiafia Iesu i le tamaititi amio lelei

ASO SA: 8 MATI 2015

MATAUPU: O TALENI

SINI: Ia a’oa’o le vasega ina ia malamalama, o taleni o meaalofa mai i le Atua, e ao ona fa’aaoga tatau.

TUSI FAITAU: Mataio 25: 14 – 30 (mo le Faiaoga)
Mataio 25: 15 (mo le Vasega)

“Ua avatu e ia taleni e lima i le tasi, ae lua a le tasi, ae tasi i le tasi; ua faatatau i le mea ua mafai ai e le tagata; ona alu loa lea o ia i lana malaga”

FESOASOANI MO LE FAIAOGA:

O le matai mauoa, ua ia tufa atu taleni i ana auauna e toatolu. Ua avatu i le tasi le lima taleni, ma le tasi le lua, ma le tasi le tasi, ona tau fai o loa lea e galulue, ina ia toe foi mai le matai, ua toe maua nisi taleni faasili.

Ua foi mai le matai, ua o mai foi ana auauna; Ua fai atu le sa i ai taleni e lima, o au taleni nei e lima ua ou maua ai isi taleni e lima, sa faapea foi i le sa i ai taleni e lua. A o lē sa i ai le taleni e tasi, ua ia nana lana taleni i le eleele.

O le uiga lena o le faataoto a Iesu, e faatatau i taleni e lima ma taleni e lua, e faatatau i le tamaitiiti galue malosi ma tauivi, e maua mea lelei. A o lē sa i ai le taleni e tasi, e feagai ma puapuaga ona ua le fa’aaoga tatau lana taleni.

Ioe tamaiti, e ese le tele o le alofa o le Atua i a’i tatou, ua ia foaina mai le tele o meaalofa, taleni ma agavaa eseese, ina ia manuia ai o tatou olaga.

UIGA O UPU MA FUAITAU:

1. mauoa - o le tagata e tele ana tupe, manaia fale e nofo ai, i ai taavale, fai ana auauna ma le tele lava o manuia o lo o i ai nei.
2. taleni - agavaa i so o se mea, meaalofa mai i le Atua
3. taufaitagiaue ma le lilivau - tagi leotele ma gatete le tino atoa

GALUEGA FAATINO:

1 Fesili:

a) E toafia auauna o lo o taua i le tala?

Tali: E toatolu(3)

e) E fia taleni na tuuina atu i le auauna muamua?

Tali: E lima (5)

i) O le a se mea na maua e le auauna sa i ai taleni e tasi ?

Tali: E le’i faamanuia i ai le matai mauoa ma iu ai i puapuaga

2. **Valivaliga Ata:** Ia fai ni kopi o le ata ua saunia ona tufa lea i le vasega e galulue ai.

PESE: When we all work together, together, together
(Afa'i tatou te galulue faatasi, faatasi faatasi)

A'OA'OGA:

1. Faamaoni i nai mea iti e tofia oe e pule i mea e tele.
2. E leaga le paie e iu ai i puapuaga ma faigata.
3. Fa'aaoga tatau meaalofa a le Atua.

ASO SA: 15 MATI 2015

MATAUPU: O LE MAUOA MA LE TAGATA MATIVA

SINI: Ia a'oa'o le vasega ina ia malamalama, o le faataoto e uiga i le tagata mauoa ma le tagata mativa.

TUSI FAITAU: Luka 16: 19 - 26 (mo le Faiaoga)
Luka 16: 25 (mo le Vasega)

“Ona fai ane lea o Aperaaamo, Lo'u atalii e, ia e manatu, na e maua au mea lelei i lou olaga, na maua foi e Lasalo o mea leaga; a o lenei, ua faaolioliina ia, a ua puapuagaina oe.”

FESOASOANI MO FAIAOGA:

O le tala o lenei Aso Sa, o le faataoto a Iesu i le tamaloa mativa ma le mauoa. O le igoa o le tamaloa mativa o Lasalo. O Lasalo e maua o ia i le ma'i papala. Ua oo atu Lasalo i le fale o le mauoa, ma aisi i ai mo sana meaai. Peita'i, na tuli i fafo ma aai faatasi ma taifau.

Ua oti Lasalo, ona aveia lea o ia e agelu i le fatafata o Aperaaamo. Ua oti foi le mauoa, ua i seoli o ia, peita'i ua ia vaai mamao atu ia Lasalo ua i le fatafata o Aperaaamo.

Ioe, o le iuga lena o le tagata sa lē alofa ma vaai maualalo i le tagata mativa, lea na saili fesoasoani i ai, ae sa ia tuli ia Lasalo i fafo mai lona fale. O lea ua faafiafiaina Lasalo, ua ia feiloai ma lona matai, ma ua siosioina o ia e agelu, ae mu i le afi le tagata mauoa.

Tamaiti, ia e alofa i so o se tasi o fia maua se fesoasoani, ona alofa mai lea o le Atua ia te oe. Aua le vaai i le tele o mea ua e maua, ma ala ua punitia ai lou alofa i le isi tagata o lo o fia maua se fesoasoani

GALUEGA FAATINO:

Valivaligā Ata: Ia fai ni kopi o le ata ua saunia ma tufa i le vasega e galulue ai.

PESE: Jesus loves me, this I know, for the bible tells me so.....

A'OA'OGA:

1. Aua le vaai maualalo ma le manatu faapito.
2. Tufa atu ona manuia lea o lou olaga.

ASO SA: 22 MATI 2015

MATAUPU: TAUPOU E TOASEFULU

SINI: Ia a’oa’o le vasega ina ia malamalama, e tatau ona ola sauni ma tapenapena i so o se taimi, ae aua le ola faatamala

TUSI FAITAU: Mataio 25: 1 – 13 (mo le faiaoga)
Mataio 25: 8 (mo le vasega)

“Ona fai atu ai lea o e vālea i e popoto; aumai ni a outou suāuu ma matou, auā o le a mamate a matou molī.”

FESOASOANI MO FAIAOGA:

O le faataoto a Iesu, e faatatau i taupou e toasefulu, na sauni ma tapena a latou moli, e o atu e faafetaia’i i le faatoafaiava. Ua popoto le toalima o i latou, ae valea le isi toalima. O taupou valea ua ave a latou moli, ae le’i ave ni a latou suauu faaleoleo. O taupou popoto ua ave a latou moli faatasi ma a latou suauu faasili.

Ua faatuai ona sau le faatoafaiava, ona momoe ai lea. Ua faafuasei ona valaau le agelu. “Faauta, ua sau le faatoafaiava, ona o atu ai lea e faafetaia’i iā te ia.

Ua tutu i luga taupou e toasefulu, ma tapenapena a latou moli. Peita’i na aisi atu taupou valea i taupou popoto, mo nai suauu mo a latou moli, ona ua mu itiiti. Ona tali atu lea o taupou popoto; “E leai, ina nei lē lava a latou suauu, ae sili ona latou o e faatau mai ni a latou suauu.”

Ua taunuu atu le faatoafaiava ona latou ulufale faatasi lea ma taupou popoto e toalima, a’o le isi toalima e taunuu atu ua tapuni le faitotoa.

Ioe tamaiti, ‘aua e te manatu mamā, pe faatauvaā lau vaai i le valaauina o oe; O le a le galuega ua valaauina ai oe e le Atua, ia e lava tapena ae ‘aua le ola faatamala.

UIGA O UPU:

1. faatoafaiava - tagata faatoa fai le toalua, faatoa faaipoipo
2. tausamaaga - o se aiga tele .

GALUEGA FAATINO:

Valivaliga Ata: Fai ni kopi o ata valivali e tufa i le vasega e galulue ai.

PESE: Suauu lau lamepa ia mu pea.

A’OA’OGA:

1. Sauni ma tapenapena i taimi uma ae ‘aua le ola faatamala.
2. Faamoemoe i le Atua e manuia ai lou olaga.

ASO SA: 29 MATI 2015 (ASO SA O LE LAUPAMA)

MATAUPU: O LE MALAGA FAATUPU A IESU

SINI: Ia a’oa’o le vasega ina ia malamalama o Iesu o le Tupu o Iutaia ma le lalolagi uma.

TUSI FAITAU: Mareko 11: 1 – 10 (mo le Faiaoga)
Mareko 11: 9 (mo le Vasega)

“Ua alalaga foi e na muamua ma e na mulimuli, ua faapea, “Osana ! Ia manuia le afio mai i le suafa o le Alii””

FESOASOANI MO FAIAOGA:

Ua oo atu Iesu ma ona so’o i Petefake ma Petania i le mauga o Olive. Ona tuli ai lea e Iesu o ona so’o e toalua, i le aai o lata ane e tatala mai le tamai asini o lo o noatia ai, e le’i tietie ai lava se tagata. A fesili ane se tasi, fai iai o lo o manao i ai le Alii, ae toe vave faafoi atu. Sa faapena ona fai.

Ua o atu nei so’o ma tatala mai le tama’i asini, ua aumai ma lafo ai luga o latou ofu, ona tietie ai lea o Iesu. Ua agai atu le malaga a le au so’o ma Iesu o lo o tietie i luga o le asini i Ierusalema, ua tamomoe ane tagata e toatele ua lafo lau o laau i luga o le ala, ua fola foi le auala i o latou ofu, a o afio atu ai Iesu. Ua alalaga tagata o lo o muamua atu ma mulimuli mai; “Osana! Ia manuia le afio mai i le suafa o le Alii”

Ioe tamaiti, o le faailoga lea, o Iesu o ia o le tupu ma le filemu o le alofa o le Atua mo tagata uma.

GALUEGA FAATINO:

Valivaliga Ata: Ia fai ni kopi o le ata ma tufa i le vasega e galulue e valivali.

Fesili:

1. O ai i latou na o malaga ma Iesu?

Tali: O le au so’o ma le motu o tagata.

2. O fea e agai i ai le malaga?

Tali: E agai i Ierusalema

3. O le a le igoa o le manu lea na tietie ai Iesu?

Tali: O le asini

4. O le a le alaga a tagata ia na alalaga ai a o afio atu Iesu i lana malaga faa-tupu?

Tali: Osana! Ia manuia le afio mai i le suafa o le Alii

PESE: Osana pepese tamaiti uma

A’OA’OGA:

1. Tumau le faatuatua ae aua le faavaivai.

2. E alofa le Atua mo tagata uma.

MANATU TAIALA O APERILA: O LE OLA FOU
(Suiga mai le oti i le ola mai le faanoanoa i le fiafia)

Ia tuuina i loto ma mafaufau o tamaiti, o Iesu o le Alii o le Ola. Ia iloa e le fanau ua toetu Iesu mai le oti. O tagata uma e talitonu ua toe soifua mai Iesu mai le oti, e maua e i latou le ola.

ASO SA: 5 APERILA 2015

MATAUPU: UA TOETU IESU

SINI: Ia a’oa’o le vasega ia malamalama, o Iesu na oti ma tanumia i le tuugamau, ae na toe ola ma toetu mai i le aso tolu.

TUSI FAITAU: Luka 24: 1 – 12 (mo le Faiaoga)
Luka 24: 6 (mo le Vasega)

“E le o iinei o ia, a ua tu; ia outou manatu i lona fetalai atu ia te outou, ina o i Kalilaia o ia.”

FESOASOANI FAIAOGA:

O le Toetu tamaiti, o lona uiga o le tagata na oti ua toe ola mai. Na faasatauroina Iesu ma ua oti ai. Ua alu le Agaga o Iesu i le Atua le Tamā, a o lona tino, ua ‘ave i le tu’ugamau ma pupuni i le ma’a.

O le ulua’i aso o le vaisapati, ua tea le Aso Sapati faa-Iutaia, ona o ai lea o fafine e to’atolu, o Maria le Makatala ma Ioana, ma Maria le tinā o Iakopo, e ‘ave mea manogi i le tu’ugamau. E taunuu atu, ma latou iloa ai, ua fuli’eseina le ma’a na pupuni ai le tu’ugamau. Ua ulu i totonu, a ua latou le iloa le tino Iesu. Aisea tamaiti? Ua alu ‘ese Iesu mai le tu’ugamau, auā ua toe ola mai i le ola fou, ua toetu Iesu.

Ua latou matata’u, a ua fai mai ia i latou tagata o lo o ofu i ofu pupula; “Se a le mea tou te saili ai le ua toe ola mai i ē ua oti?” Ia outou manatu i lona fetalai atu ia te outou, ina o i Kalilaia o Ia. E tataua ona tu’uina atu o le Atalii o le tagata i luma o tagata agasala, ma ia faasatauroina, ma toe tu mai le aso tolu.

Tamaiti, na faasatauroina Iesu, na maliu, ua mavae aso e tolu ona toe tu mai ai lea o Ia. Ua toe ola mai. Na oti Iesu mo le faamagaloina o agasala a tagata uma, ua toe tu mai i le ola fou, ina ia maua e tagata le ola pea.

UIGA O UPU:

- i) vaisapati - o le aso e soso’o ma le sapati.
- ii) tafa o ata - ua latalata ina malamalama le aso fou i le ave o le la.
- iii) fememea’i - ua leiloa le mea e fai.
- iv) soifua - o le upu fa’aaloalo o le ola.
- v) toetu - ua toe ola mai.
- vi) matata’u - fefefe

GALUEGA FAATINO:

1. Valivaligā Ata

PESE: 51 (Pese ma Viiga)

A'OA'OGA:

1. O Iesu e maua ai le ola fou.
2. Ia faalagolago ia Iesu, e maua ai le ola fou.

TATALO:

Le Atua e, ia galue mai le Agaga Paia, ina ia mau i o matou loto, ua toetu Iesu, e matou te ola foi i le ola fou ia te ia. Amene.

ASO SA: 12 APERILA 2015

MATAUPU: UA TOE FAAOLAINA LASALO MAI LE TU'UGAMAU

SINI: Ia a'oa'o le vasega ina ia malamalama na toe ola mai Lasalo ai le tu'ugamau ina ua valaau i ai Iesu e sau i fafo.

TUSI FAITAU: Ioane 11: 30 – 44 (mo le Faiaoga)
Ioane 11: 44 (mo le Vasega)

Ona alu ai lea i fafo o le na oti, ua fusifusia ona vae ma ona lima i fusi, ua fusi foi ona mata i le solosolo. Ona fetalai atu lea o Iesu ia te i latou; "Tatala ia ia te ia, ina tu'u atu ia e alu."

FESOASOANI MO FAIAOGA:

O Lasalo ma ona tuafafine e toalua, o Maria ma Mareta, o uo lelei a Iesu. E masani ona alu so'o i ai Iesu i lo latou aiga. Ua ta'u atu ia Iesu, ua ma'i tigaina Lasalo. A ua le alu i ai Iesu. Ua nofo i le mea sa iai. Ua oo ina alu Iesu e asi Lasalo, e taunuu atu i le aiga o lana uo, ua aso fa talu ona maliu o ia. Ua uma ona tanu i le tuugamau.

Ua tagi lava Maria ma faapa'u i vae o Iesu. Ua fai atu, ana e iinei, po ua le oti Lasalo. Ua tagi Iesu, ma faapea atu, o fea na outou tuuina i ai o ia? Ua fai atu Iesu, Ia ave 'ese le ma'a. Ona fai mai ai lea o Mareta; "Le Alii e, ua oo ina manogi o ia, auā o lona fa lenei o po talu ona oti Lasalo.

Fai mai Iesu ia Mareta, "ou te le i fai atu foi e te talitonu mai, ona e vaai lea i le ofoofogia o le pule alofa a le Atua." Ua le fiafia lava Iesu i le le talitonu o Mareta. Ua ia valaau atu ai, ia ave'ese le ma'a ai le tuugamau. Ua tepa a'e Iesu i le lagi, ona ia alaga lea ma le leo tele, "Lasalo e, ina sau ia i fafo." Ona sau ai lea o Lasalo na oti mai le tuugamau, ua toe ola. O lo o fusifusi ona vae ma lima, ma ona mata i le solosolo. Ua tatala ia te ia, ona toe ola ai lea o Lasalo mai le tu'ugamau.

Tamaiti, e toe ola mai tagata uma mai le tu'ugamau, pe a usita'i ma faalogo ia Iesu.

GALUEGA FAATINO:

Valivaligā Ata: Fai ni kopi (copies) o le ata ua saunia ma tufa i le vasega e valivali.

PESE: "O le Atua e ofoofogia"

A'OA'OGA:

1. E toe ola mai le tu'ugamau tagata uma e talitonu ia Iesu.
2. O Iesu o le toetu ma le ola.
3. O Iesu o le puna o le ola

ASO SA: 19 APERILA 2015

MATAUPU: UA TOE OLA LE AFAFINE O IAIRO

SINI: Ia a’oa’o le vasega ia malamalama, e toe ola le tagata e saili ia Iesu i le faatuatua.

TUSI FAITAU: Mareko 5: 35 – 43 (mo le Faiaoga)
Mareko 5: 41 (mo le Vasega)

Ona tago ifo lea o ia i le lima o le teine, ma fetalai atu ia te ia, “Talita Kumi,” o lona uiga o lona faamatalaga lenei, “Funa e, ou te fai atu ia te oe ia e tulai.”

FESOASOANI MO FAIAOGA:

Ua o mai tagata mai le aiga o Iairo, e ta’u mai, ua oti lona afafine i le ma’i. E ‘aua le toe faalavelaveina le a’oa’o o Iesu i lana galuega.

Ua faalogo atu i ai Iesu, ona ia fetalai atu lea i le pule o le sunako, “Aua e te mata’u; tau lava ina e faatuatua.” Ua o i totonu o le fale Iesu, ma Peteru, ma Iakopo ma Ioane ma matua o le teine. Ua faasa e Iesu se isi lava tagata ona ulufale i totonu o le fale o lo o taoto ai le teine ua oti.

Ua vavao e Iesu i latou o fetagisi, ma fetalai atu, “E le o oti le teine o lo o moe.” Ua oo Iesu i le mea o taoto ai le teine, ma fetalai atu ia te ia. “Talita Kumi”, o lona uiga Funa e, ou te fai atu ia te oe, ia e tula’i. Ona tu loa lea i luga o le teine ua savali. E sefulu lua tausaga o le matua o le teine.

Ua ofo uma tagata na i ai, auā ua toe ola le teine na oti. Tamaiti, o le faatuatua o le pule o le sunako ia Iesu na toe ola ai lona afafine na oti. Toaaga la ia i le aoga Aso Sa ma le lotu e alofa mai ai Iesu ma faaola ia i tatou.

UIGA O UPU

1. sunako - fale e fai ai lotu
2. lauaitu - tagi leo tele
3. taufaiaue - tagi tautala
4. tapisa - aamu
5. Talita Kumi - Funa e, ou te fai atu ia te oe ia e tula’i.

GALUEGA FAATINO:

Valivaligā Ata: Fai ni kopi o le ata e tufa i le vasega e galulue ai.

PESE: O lima o Iesu, o lima agalelei.

A’OA’OGA:

1. Tatalo ma le faatuatua ia Iesu, e ola ai.
2. O Iesu o le Alii Toetu.

ASO SA: 26 APERILA 2015

MATAUPU: O LE TAMA NA FAAOLAINA E IESU

SINI: Ia a’oa’o le vasega ina ia malamalama, o le faaolaina o le tama a le fafine ua oti lana tane, na suia ai lona faanoanoa i le fiafia.

TUSI FAITAU: Luka 7: 11 – 17 (mo le Faiaoga)
Luka 7: 14 (mo le Vasega)

Ua maliu ane o ia, ua pa’i atu i le fata ona tutū mai ai lea o le au fata, ona fetalai atu lea o Ia; “Le taulealea e, ou te fai atu ia te oe, Ina tulai ia.”

FESOASOANI MO FAIAOGA:

O le alofa o Iesu e mutimutivale mo tagata mafatia uma. Ua mafatia tele le fafine, ua oti lana tama e to’atasi. E le gata ua oti lana tama e toatasi, a ua leai sona toalua ua oti foi. O se fafine ua mafatia tele, ma ua tumu lona loto i le faanoanoa.

Ua oo atu Iesu ma ona so’o i le faitotoa o le aai lea e igoa ia Naina. Ua fata mai le tama lea e to’atasi, a le fafine lea ua oti foi lana tane. Ua tumu i le faanoanoa ma le tagi tele.

Ua silasila atu i ai Iesu, ua na iloa le mafatia tele o si tinā. Ona mutimuti alofa ai lea o le Alii ia te ia. Ua fetalai atu i le fafine, “Aua e te tagi.” Ua oo atu Iesu ma pa’i i le fata, ona tutu mai ai lea o tagata na latou amoina le fata o le tama ua oti. Ona fetalai atu lea o Iesu, “Le taulealea e, ou te fai atu ia te oe, Ina tula’i ia. Ona nofo ai lea i luga o le tama na oti, ua tautala. Ona tu’uina atu ai lea e Iesu i lona tinā.

E ‘ese le alofa ma le loto fesoasoani o Iesu i tagata puapuagatia ma mafatia.

GALUEGA FAATINO:

Valivaligā Ata:

PESE: Mafatiaga e ‘ave ia Iesu (Cast your burden unto Jesus)

A’OA’OGA:

1. Ave ia Iesu o tatou mafatiaga.
2. Ave’ese e Iesu o tatou faanoanoaga.
3. E le mana’o Iesu e tatou te fetagisi.

MANATU TAIALA O ME: O TINĀ LOTO TETELE
(Suiga mai le fefe ma le popole i le loto tele)

Ua filifilia le manatu taiala ua tā'ua i luga, e autū i ai Mataupu o lenei masina. O lo o atagia ai foi i tala o lenei masina, suiga mai le fefe ma le popole o nei tinā i le loto tetele, e pei ona i ai i le tatou manatu aoao, "O LE ATUA MA SUIGA."

ASO SA: 3 ME 2015

MATAUPU: O IOKAPETA LE TINĀ O MOSE

SINI: Ia a'oa'o le vasega ina ia malamalama, na fai e Iokapeta le auala e faasaoina ai lana tama o Mose mai le pule sauā a Farao.

TUSI FAITAU: Esoto 2: 1 – 10 (mo le Faiaoga)
Esoto 2: 3 (mo le Vasega)

"Ua lē toe mafai ona nā ia te ia, ona ia ave lea mo ia o le ato kome, na ia puluti ai i le pulu emeri, ma le pulu safeta, na ia tu'u ai le tama, ona tuuina ai lea i le vao utuutu i le auvai o le vaitafe."

FESOASOANI MO LE FAIAOGA:

O Amaramo ma lona toalua o Iokapeta, o tagata o sā Levi i le nuu o Isaraelu (Esoto 6: 20). Na fanau e Iokapeta se tama tane i le vaitaimi o le tulafono a le tupu o Aikupito o Farao, a fanau mai se tama teine, ona faaola lea, ae a fanau mai se tama tane, 'aua le faaolaina.

Sa tausi ma nanā e Iokapeta si ana tama, seia oo atu i le tolu masina, ua lē toe mafai ona nanā o ia, auā ua leo tele le tagi a le tama. Na iloa lelei e Iokapeta, e maua lava e se tasi si ana tama. O le mea la lea na ia faia ina ia faasaoina mai ai o ia.

Ua ia lalaga se ato kome, ma faapulu i le pulu emeri, ma le pulu safeta, ina ia 'aua nei sao atu se vai i totonu o le ato. Ua fofola foi le ie, ma tu'u loa i totonu lana tama, ona faatafetafea lea i le auvai o le vaitafe, a o vaavaai atu i ai lona tuafafine o Miriama. Ua o mai nei le taelega a le afafine o Farao ma ana auauna teine i le vai, ma latou mauaina ai le ato o tafetafea atu. Ua tatala le ato, ma maua ai se pepe aulelei tele.

Ua tagi le tama, ona alofa lea i ai o le afafine o Farao ma faapea lana tala, e pei lava o se tamaitiiti Eperu lenei. Ua fai atu Miriama ia te ia, pe a alu e su'e mai se fafine Eperu na te tausia le tama mo ia. Na alu Miriama i lona tinā, ona sau ai lea o Iokapeta. Ona fai atu lea o le afafine o Farao ia te ia, "Ia e ave lenei tama ma e tausi mo a'u." Ua ia faaigoa foi le tama iā Mose, auā o le tama na ia toina a'e nai le vai.

Tamaiti, sa lagona le fefe ma le popole o Iokapeta i le taimi na fanau mai ai lana tama, ae sa ia maua le loto tele e fai le auala e faasaoina ai o ia, atoa ai ma le alofa faaola o le Atua.

UIGA O UPU:

vao utuutu - o le vao e tutupu ma ola i faaputuga i se vai
puluti - momono po o le faapipi'i, faatumu avanoa

GALUEGA FAATINO:

1. Fesili ma Tali

a) O ai le igoa o le pepe na faasaoina?

Tali: O Mose

e) O ai matua o Mose?

Tali: O Amaramo ma Iokapeta.

i) O a igoa o pulu na puluti ai le ato kome?

Tali: O le pulu emeri ma le pulu safeta.

o) O le a le uiga o le igoa o Mose?

Tali: O le na tōina a'e nai le vai.

2. Valivaligā Ata: Ia fai ni kopi o le ata e tufa i le vasega e galulue ai.

PESE:

1. Iokapeta le tinā loto tele
Na lalaga le ato kome mo si ana pepe
Ina ia faasaoina ai o ia
Le tulafono a Farao e matautia.

Tali: O pulu emeri ma le safeta na puluti ai
Ia 'aua nei sao atu i ai o se vai
Talofa i le tama ua tagitagi mai
I totonu o le ato kome na ia fai.

2. A o tafetafea atu o ia
I totonu o le vai o le naila
A o tu mamao atu ma le maligi o loimata
Ia si ona tuafafine o Miriama.

3. Le afafine o Farao ma lana galu teine
Na o ifo i le vai e taele
Ma ua latou mauaina ai le pepe
Mana'o loa e tausī mo ia i aso e tele.

[Fati o le Pese: E leai sa'u siliva po o se auro]

A'OA'OGA:

1. Sa loto tele Iokapeta e fai le auala e faasaoina ai lana tama.
2. Ia maua e tatou uma le loto tele e fai ai mea lelei mo le Alii.

ASO SA: 10 ME 2015 (ASO SA O TINĀ)

MATAUPU: O RAAVA MA TAGATA ISARAEU E TOALUA

SINI: Ia a’oa’o le vasega ina ia malamalama, o le loto tele o Raava na faasaoina ai tagata Isaraelu e toalua.

TUSI FAITAU: Iosua 2: 1 – 19 (mo le Faiaoga)
Iosua 2: 4 (mo le Vasega)

“A ua uma ona ave e le fafine o ia tagata e toalua, ua nanā ia te i laua, ma ua faapea ona fai atu, Na o mai tagata ia te au, a ou te le iloa pe na o mai ifea i laua.”

FESOASOANI MO FAIAOGA:

Na aauina atu e Iosua tagata e toalua e o e asiasi i le nuu o Ieriko. Na o atu i la’ua ma ulufale atu i le fale o le fafine e igoa iā Raava ma nonofo ai. Ua oo le tala i le tupu o Ieriko o lo o i ai tagata e toalua i totonu o le aai, o lea na alu ai lana feau iā Raava, ina ia tuu atu nei tagata na ulufale atu i lona fale, auā na la o atu e asiasi ma vaavaai i le nuu uma. A o Raava, ua ia ave nei tagata e toalua ma nanā i luga o lona fale, ma tanuma’i iā te i la’ua i laau o lino na folasia i luga o le fale. Ua ia fai atu i e na auina atu e le tupu, ou te lei iloa pe na o mai i fea i la’ua, na lata loa o le a tapuni le faitotoa o le aai, ona o atu ai lea o ia tagata. Ia vave ona tuliloa atu iā te i la’ua; auā tou te maua atu lava.

Ua iloa e Raava mea ofoofogia ma vavega uma na faia e le Atua mo lona nuu talu ona o ese mai Aikupito, o lea na ia fai ane ai i tagata e toalua, ina ia faasaoina o ia ma lona aiga uma pe a foa’iina atu e le Atua le nuu uma mo Isaraelu, auā na ia agalelei atu iā te i la’ua.

Tamaiti, o le loto tele o Raava i lona nanāina o tagata nei e toalua, na lavea’iina ai o ia ma lona aiga uma, ina ua faaumatia e Isaraelu tagata ma mea ola uma sa i ai i Ieriko.

UIGA O UPU:

lino - o le laau sa fa’aaogā e fai ai lavalava.

GALUEGA FAATINO:

Valivaligā Ata: Ia fai ni kopi o le ata e tufa i le vasega e galulue ai.

PESE: Lautele pei o le vasa
Wide wide as the ocean

A’OA’OGA:

1. Sa loto tele Raava e nanā tagata Isaraelu mai le tupu o Ieriko.
2. Ia tatou loto tetele e fai mea lelei mo le Alii.

ASO SA: 31 ME 2015

MATAUPU: UA TALI LE ATUA IĀ HANA

SINI: Ia a’oa’o le vasega ina ia malamalama na tali le Atua i le tatalo a Hana.

TUSI FAITAU: 1 Samuelu 1: 1 – 20 (mo le Faiaoga)
1 Samuelu 1: 20 (mo le Vasega)

“Ua oo i ona aso na to ai Hana,ua fanau mai le tama tane, ua ia faaigoa ia te ia o Samuelu, ua faapea ia; “Auā na ou faatoga i le Alii mo ia.”

FESOASOANI MO FAIAOGA:

O Hana, o le avā a Elekana. Sa maua Hana i le faanoanoa ona o le leai o sana tama. Ua oo i le tasi aso, ona alu ai lea o Hana i le malumalu, ma ua ia tatalo atu i le Atua, ina ia alofagia o ia, ma foa’i mai se tama mo ia. E le gata i lea, afai e foa’iina mai e le Atua iā te ia se tama, ona toe ofoina atu lea o le tama mo le Atua ma lona finagalo.

Sa faafogaina e le Atua le tatalo a Hana, ma ua foa’iina mai ai iā Hana se tama tane. Sa faaigoaina e Hana lana tama o Samuelu, o lona uiga – “Ua faafogaina e le Atua.” Auā ua ia faapea, “Na ou faatoga i le Alii mo ia.”

Tamaiti, o le suiga o le loto faanoanoa i le fiafia sa maua e Hana, auā sa leai sana tama, a o lea ua foa’i mai e le Alii le tama mo ia, e pei ona ia tatalo atu ai i le Alii mo ia.

GALUEGA FAATINO:

Valivaligā Ata: Ia fai ni kopi o le ata e tufa i le vasega e galulue ai.

PESE: Fai sau tatalo
Whisper a prayer

A’OA’OGA:

1. Sa tatalo Hana i le Atua mo sana tama.
2. Ia tatou toaaga e tatalo i le Atua.

MANATU TAIALA O IUNI: O LE SUIGA O LE SIOSIOMAGA O LE TAGATA

Ua filifilia lenei manatu autu, ina ia iloa ma malamalama tamaiti i le suiga tele o le siosiomaga sa ola ai tagata i taimi o le Tusi Paia, e faatusa i le siosiomaga i le taimi nei.

ASO SA: 7 IUNI 2015

MATAUPU: O FALE SA NONOFO AI

SINI: Ia a’oa’o le vasega ina ia malamalama i foliga o fale sa nonofo ai tagata i taimi o le galuega faaola a Iesu.

TUSI FAITAU: Mareko 2: 1 - 5 (mo le Faiaoga)
Mareko 2: 4 (mo le Vasega)

“Ua le mafai foi i latou ona faalatalata atu ia te ia, auā o le motu o tagata, ona latou tatata lea o le ufi o le fale sa i ai o ia, ua faasosofa i ai, ona latou tuutuu ifo ai lea o le moega o taoto ai le supa.”

FESOASOANI MO FAIAOGA:

Sa i ai Iesu i le fale o se tasi o ona so’o, ma ua lolofi atu i ai le motu o tagata, ua lē ofi ai le fale. O fale o Iutaia i taimi o Iesu, e lē o ni fale tetele. Ua na o le aiga lava e ofi ai. O tualuga o fale e mafai ona susu’e. E ato i palapala ia laupapa o le tualuga. E i ai foi fasitepu e alu i le tualuga, auā e aogā foi e malōlō i ai le aiga.

Ua le mafai ona oo atu i latou na fataina atu le tagata supa ia Iesu, ona o le tumu o tagata i totonu o le fale. Ona o a’e ai lea o tagata i le sitepu i fafo o le fale agai i luga ma ave’ese le tualuga o le fale. Ua latou tu’utu’u ifo ai le fata o le mai supa i le mea tonu o i ai Iesu.

Ua mutimutivale le alofa o Iesu, ona ia faamalolo ai lea o le tagata supa. E ‘ese lava fausaga o fale i taimi o Iesu, e ‘ese foi fausaga o fale i taimi nei.

UIGA O UPU:

1. faasosofa - faaofiofi

GALUEGA FAATINO:

Valivaligā Ata: Ia fai ni kopi e tufa i le vasega e valivali.

PESE: O le tagata poto na fau lona fale i luga o le papa.

A’OA’OGA:

1. Talia fiafia tagata i lou fale.
2. Faamamā lou loto, auā o le fale e afio ai le Agaga Paia.

ASO SA: 14 IUNI 2015

MATAUPU: UA TIETIE PALAAMO I LE ASINI

SINI: Ia a’oa’o le vasega ina ia malamalama o le asini o le tasi lea o manu aoga, mo femalagaina i taimi o le Feagaiga Tuai.

TUSI FAITAU: Numera 22: 21 - 31 (mo le Faiaoga)
Numera 22: 30 (mo le Vasega)

Ona fai mai ai lea o le asini ia Palaamo, E le o lau asini ea a’u nei, ua e tietie ai talu ona e maua o a’u ua oo mai i le aso nei? O la’u masani ea ona fai faapea ia te oe? Ona faapea atu ai lea o ia, E leai lava.”

FESOASOANI MO FAIAOGA:

O le asini e fa’aaoga e perofeta, ma tupu e malaga ai i taimi anamua i Palesetina. Na tietie le perofeta o Palaamo i lana asini, e alu i Moapi e fetu’u Isaraelu le nuu o le Atua. Ua lē fiafia le Atua iā Palaamo ina ua malaga e alu i Moapi. Na auina atu ai loa le agelu a le Alii, ma tu mai le ala e taofi le malaga a Palaamo.

Na vaai atu le asini i le agelu a le Alii, o lo o tu mai le ala, ona ‘alo ese ai lea ma le ala, ua ui i le togavao. Ona sasa ai lea e Palaamo le asini e toe faafoi i le ala. Ua tu mai foi le agelu a le Alii, i le va o laina e lua o le togavine. Ua atili ai ona ‘alo le asini mai le ala, ma ua pipi’i i le aupā, ma i’u ina omia ai ma le vae o Palaamo. Ua toe sasa ai foi e Palaamo le asini.

Ua toe tu mai foi le agelu a le Alii i le avanoa itiiti o le ala ua le mafai ai e le asini ona la’asia se isi ana la’a, ma ua taoto ifo ai loa i lalo. Ona ita tele ai lea o Palaamo ma ia toe sasa ai le asini i le laau. Ua fai mai le asini ia Palaamo, se a se mea ua ou faia ia te oe, ua e sasa faatolu mai ai ia te au?

Ua tali atu Pala’amo, auā ua e faaonoono mai ia te au, se ana na i lo’u lima se pelu, po o penei ua ou fasi matea nei oe. Ua toe tali mai le asini, “E lē o lau asini ea a’u nei, ua e tietie ai talu ona e maua o a’u ua oo mai le aso nei?” Ona faapupulaina ai lea o mata o Palaamo, ma ia iloa ai le agelu a le Alii, o lo o tu mai ma le pelu. Ana le ‘alo ‘ese le asini, semanu ua fasiotia Palaamo e le agelu. O le asini sa femalagaa’i ai tagata i aso uma. Ua lē toe vaaia se tagata o toe tietie i se asini i aso nei.

UIGA O UPU:

- | | | |
|--------------|---|--------------|
| 1. fasimate | - | tape |
| 2. va apiapi | - | vaiti |
| 3. aupa | - | o le pa ma’a |
| 4. faaonoono | - | faaita |
| 5. fetu’u | - | faamalaia |

GALUEGA FAATINO:

Valivaligā Ata: Ia fai ni kopi o le ata e tufa i le vasega e valivali.

PESE: “O le taavale afi o le Tala Lelei”

A’OA’OGA:

1. E aoga mea uma na faia e le Atua.

ASO SA: 21 IUNI 2015

MATAUPU: O OFUTAU

SINI: Ia a'oa'o le vasega ina ia malamalama i ofutau na fa'aoga i taua i aso anamua e faatusa i ofu tau i aso nei.

TUSI FAITAU: 1 Samuelu 17: 4 – 7 (mo le Faiaoga)
1 Samuelu 17: 5 (mo le Vasega)

“Sa i lona ulu le pulou ‘apa memea sa ofu foi i le ufi fatafata fauna o i’a; o le mamafa o lona ufi fatafata ua lima afe sekeli apa memea.”

FESOASOANI MO FAIAOGA:

O ofu tau o toa ta'uta'ua, e pei ona faamatala mai le Tusi Paia, e matuā tulaga ese lona mataina. E lē gata e malualii, ma e ta'u mai lava i ofu tau pe a vaavaai i ai, le matautia o le toa pe a ofu ai.

Ina ua tulai mai Koliata le toa o Filisitia, e aumai lana lu'i iā Isaraelu, e ofo atu se tagata la te tau. O ofu lava o Koliata ma ana mea tau na vaavaai mai i ai Isaraelu, na liu suavai ai o latou loto i le palaai.

O ofu tau o Koliata e aofia ai le pulou apa memea, sa ofu i le ufi fatafata faauna o ia, o lona mamafa e lima gaafe o sekeli o apa memea. O ufi vae apa memea, ma le tao apa memea i lona vaitau'au. O le fuata o lona tao e pei o le laau faalava o le lalaga ie, ma le matatao o lana tao e ono galau sekeli o u'amea.

E le gata ina pupula mai ai le toa i lona tulai mai, a o le mamafa ma anagata, ma lona taugatā. A oo ina ofuina e le toa, nei ofu tau taugatā, e faailoa mai ai lona matautia ma lona loto toa. O ofu tau o tagata o le Atua, e pei o tamaiti, e oofu i ofu tau o le usita'i, amio lelei, ma le mata'u i le Atua. E manumalo ai mai mea leaga uma.

UIGA O UPU:

1. vaitau'au - va o tau'au
2. kupita - 18 inisi

GALUEGA FAATINO:

Valivaligā Ata. Fai ni kopi ona tufa lea i le vasega e valivali.

PESE: Onward Christian Soldiers
Marching as to War.

A'OA'OGA

1. Ia ofu i ofu tau o le Tala Lelei.
2. Ia oofu i le usita'i.

ASO SA: 28 IUNI 2015

MATAUPU: O LE OLA TAPUA'I

SINI: Ia a'oa'o le vasega ia malamalama e fiafia le Atua i tagata e tapua'i atu ia te Ia i le agaga ma le faamaoni.

TUSI FAITAU: Ioane 4: 19 - 24 (mo le Faiaoga)
Ioane 4: 24 (mo le Vasega)

“O le Atua o le agaga lava ia; o e tapua'i ia te Ia, e tatau ona tapua'i atu i le agaga ma le faamaoni.”

FESOASOANI MO FAIAOGA:

Ua faafesoaa'i le fafine Samaria ma Iesu i luga o le vaieli. O le vaieli o i luga a'e o le mauga. O le mauga lea e fai ma mea e o mai i ai tagata Samaria e tapuai ai i le Atua. Ua fai mai le fafine o le mauga lenei matou te tapua'i ai, a'o o outou ua fai mai o Ierusalema tou te tapua'i ai. Ua tali atu Iesu, “E oo mai le aso tou te tapua'i i le Tamā e le gata i lenei mauga, po o Ierusalema. Tou te tapua'i ma le lē iloa, a o matou o tagata Iutaia ua tapua'i ma le iloa, aua e mai ia Iutaia le faaolataga.

A e oo mai ona aso, ua oo nei foi i ai, o e tapuai faamaoni latou te tapuai i le Tamā i le agaga ma le faamaoni, aua o lo o saili le Tamā i e tapua'i faapena ia te ia. O le mea o lo o mana'o ai Iesu ia i tatou tamaiti, ina ia tu'u atu atoā o tatou agaga ia te ia, ina ia fiafia mai o ia ia i tatou. O le loto mama, loto alofa, ola usita'i ma amio lelei o le ola tapua'i faamaoni lava lea i le Atua. Ia toaaga e tatalo, ma faitau le Tusi Paia i aso uma.

GALUEGA FAATINO:

1. Valivaligā Ata. Ia fai ni kopi ona tufa lea i le vasega e valivali.

PESE: Faitau le Tusi Paia ma tatalo i aso uma.

A'OA'OGA:

1. Toaaga i le lotu.
2. Tatalo i aso uma
3. Faatuatua ia Iesu Keriso e faaolaina ai.

**MANATU TAIALA O IULAI: SUIGA E ALA I FAAMALOLOGA
(Suiga mai le ma'i i le malosi ma le maloloina)**

O le manatu ta'iala o lenei masina, ia faailoa i tamaiti, o Iesu e maua ai le malosi ma le maloloina. O lo o molimau ma faamaonia mai i tala o le Tusi Paia, i galuega o le faaolataga na faia e Iesu.

ASO SA: 05 IULAI 2015

MATAUPU: UA FAASA'O LE TUA O LE FAFINE

SINI: Ia a'oa'o le vasega ia malamalama o le alofa o le Atua ua toe sa'o ai le tua o lenei fafine.

TUSI FAITAU: Luka 13: 10 13 (mo le Faiaoga)
Luka 13: 12 (mo le Vasega)

Ua silafia o Ia e Iesu, ona valaau atu lea o ia ia te ia, "Funa e, ua tatalaina lou vaivai."

FESOASOANI MO FAIAOGA:

A o a'oa'o Iesu i le sunako i le sapatu, sa i ai faatasi ma le fafine ua i ai le agaga na vaivai ai i tausaga e sefulu ma le valu. E faano'uno'u lava lenei fafine i aso uma e le mafai lava ona tu sa'o i luga.

Ua iloa atu o ia e Iesu ona vala'au atu lea ia te ia ua Ia faapea atu; "Funa e, ua tatalaina lou vaivai." Ua faae'e atu foi ona aao ia te ia, ona sa'o ai lea o lona tua. Ua le toe faano'uno'u, a ua tu sa'o ma savali sa'o. Ua vivii atu foi o ia i le Atua.

Ua fa'aalia i lenei faamalolōga a Iesu, lona alofa i so o se tagata e feagai ma mafatiaga. Na ona silasila atu lava o Iesu i le fafine ua leva ona mafatia ma lenei vaivaiga o lona tino, ona Ia alofa lea i ai, ma faamalolō loa. Tamaiti, ia tatou talitonu nei loa, o Iesu o le foma'i mo tatou ma'i uma.

UIGA O UPU:

1. faano'uno'u - savali punou e le sa'o le tua.
2. tatalaina - sa'oloto.

GALUEGA FAATINO:

Valivaliga Ata: Ia fai ni kopi o le ata e tufa i le vasega e galulue ai.

PESE: Alofa o se mea ou te faasoa atu/Love is something that you give away.

A'OA'OGA:

1. E maua le malosi fou ia Iesu.
2. Ia alofa i tagata puapuagatia.

ASO SA: 12 IULAI 2015

MATAUPU: O LE TAMA SA I AI LE TEMONI

SINI: Ia a’oa’o le vasega ia malamalama o le mana o Iesu, ua alu ‘ese ai le temoni mai le tama.

TUSI FAITAU: Luka 8: 26 – 39 (mo le Faiaoga)
Luka 8: 39 (mo le Vasega)

“Ina foi atu ia i lou aiga ma faamatala mea tetele ua faia e le Atua ia te oe.” Ona alu ai lea o ia, ua tala’i i le aai uma i mea tetele na faia e Iesu ia te ia.

FESOASOANI MO FAIAOGA

O le tama o le laueleele o Katara, ua ulutinoina e agaga o temoni po o aitu. O igoa o agaga o temoni po o aitu o Lekeono. O lona uiga ua ulutino le tama e aitu e toatele. O le pogai lea e motusi ai uamea na saisai ai le tama.

Ua iloa e aitu po o temoni, o le a tutuli ‘ese e le pule a Iesu i latou mai totonu o le agaga o le tama. Na ala ai ona manana’o ia Iesu, e tutuli i latou ia latou ulu i puaa. Ona o ai lea o temoni i fafo nai le tama, a ua ulutino i puaa, ona feosofi lea o puaa i le tofe i le vai, ma malelemo ai.

Ua o mai tagata ua matamata i le tama na ulutino e temoni, o lo o nofo i vae o Iesu. Ua ofu o ia, ua amio filemu foi. Ua matata’u tagata i lenei mea tulaga ‘ese. Ua suia le tigaina i temoni, i le filemu ma le alofa o Iesu.

UIGA O UPU:

1. Lekeono - o temoni e toatele
2. tofē - maulalō

GALUEGA FAATINO:

Valivaliga Ata: Fai ni kopi o le ata valivali e galulue ai le vasega.

PESE: Tuli ese, tuli ese, tuli ese
Satani mai lou agaga.

A’OA’OGA

1. Ia avanoa lou agaga mo Iesu.
2. Ia talia le Agaga Paia e nofo mau i lou loto.

ASO SA: 19 IULAI 2015

MATAUPU: O AI NA PA'I IĀ IESU?

SINI: Ia a'oa'o le vasega ia malamalama na malōlō le fafine puna toto ina ua pa'i i le tu'upao o le ofu o Iesu.

TUSI FAITAU: Luka 8: 43 – 48 (mo le Faiaoga)
Luka 8: 47 (mo le Vasega)

Ua iloa e le fafine ua le lilo o ia, ona alu lea o ia ma le gatete, ua faapa'i mai i ona luma, ma faamatala mai ia te ia i luma o le nuu uma le mea na pa'i atu ai o ia ia te ia, ma le faamalōlōina loa o ia."

FESOASOANI MO FAIAOGA:

Ua tautulei ma feomia'i tagata i le fia vaai ma matamata i galuega o le faaolataga a le Atua, ua faia e Iesu. A o le fafine ua maua i le ma'i puna toto i tausaga e sefulu ma le lua, ua faamalosī atu i le tumutumu o tagata, ina ia fia maua lava se vaega o le ofu o Iesu e pa'i i ai.

Ua ia talitonu, po o se vaega o le ofu o Iesu e pa'i i ai, e malōlō ai o ia mai lona ma'i ua umi tele o ia tauaveina. Ua pa'i le fafine i le tu'upao o le ofu o Iesu, ona ia lagonaina lea o lona faamalōlōina.

O Iesu ua matuā fesilisili solo, po o ai lea na pa'i atu ia te ia? Ua fefe le fafine, auā ua na iloa e le lilo lava ia Iesu o ia. Ua faapa'u le fafine i luma o Iesu, ma tautino atu o ia lava na pa'i atu ona o lona fia maua o se malologa mai lona ma'i, e pei ona ia lagona lona malosī fou. Ua fetalai Iesu, "Lo'u afafine e, o lou faatuatua ua e malōlō ai, alu ia oe ma le manuia.

UIGA O UPU:

1. tu'upao - pito o le ofu
2. fetuleni - o mai faatasi
3. fetaomi - feoma'i

GALUEGA FAATINO:

Valivaligā Ata

PESE: Shackled by a heavy burden
Neath a load of guilt and shame
Then the hand of Jesus touched me
Now I am no longer the same.

Gh:- He touched me Oh he touched me
And O the joy that flood my soul
Something happened and now I know
He touched me and now I am whole.

A'OA'OGA:

1. Saili i le faatuatua iā Iesu.
2. Alu ma le loto tele iā Iesu.

ASO SA: 26 IULAI 2015

MATAUPU: O LE TA'ITA'I 'AU FAATUATUA TELE

SINI: Ia a'oa'o le vasega ina ia malamalama, o le faatuatua o le ta'ita'i, na malolo ai lana auauna.

TUSI FAITAU: Luka 7: 1 – 10 (mo le Faiaoga)
Luka 7: 7 (mo le Vasega)

“O lea na ou manatu ai ou te lē aogā ona ou alu atu ia te oe. A ia oo mai sau fetalaiga e faamalōlō ai lau auauna.”

FESOASOANI MO FAIAOGA:

Ua ma'i tigaina, ua tali oti le auauna lelei tele, a le ta'ita'i o le to'aselau, o se tagata loto fesoasoani. Na ia faia foi le sunako mo tagata Kapanau. Ua ia aauina atu toeaia o Iutaia, ia aioi ia Iesu e alu atu se'i faaola lana auauna.

Ua faalogo Iesu i mea lelei na ia faia, ona alu ai lea i le fale o le ta'ita'i o le to'aselau e faamalōlō i lana auauna. Peita'i, e le'i oo atu Iesu i le fale ae taunuu mai le feau a le ta'ita'i. Le Alii e, 'aua le faalavelaveina oe, auā e lē aogā a'u e te ulu mai ai lo'u fale. Tau lava o sau fetalaiga, e faamalōlōina ai la'u auauna.

Ua ofo lava Iesu i lenei faatuatua tele. Ona malōlō ai lea o le auauna a le ta'ita'i, auā ua o mai fo'i mai le fale e na auina mai e tau mai ua malōlō le auauna.

UIGA O UPU:

1. faatoga - aioi
2. aioi - mana'o mai.

GALUEGA FAATINO:

1. Valivaligā Ata: Ia fai ni kopi e tufa i le vasega e galulue ai.

PESE: Seek first the kingdom of God.

A'OA'OGA:

1. O le faatuatua e te oo i ai i le malo o le Atua.
2. E ola le isi tagata i lou faatuatua.

AOKUSO:

MANATU TAIALA: O LE VALAAUINA O NISI TAMĀ ILOGA O LE TUSI PAIA

FAATOMUAGA:

Talu ai ona o lenei masina e faapitoa mo tamā, o lea ua filifilia ai le manatu taiala e pei ona tā'ua i luga e fa'aautu i ai mataupu o lenei masina, ina ia a'oa'oina ai le fanau i nisi o tamā iloga o le Tusi Paia.

ASO SA: 2 AOKUSO 2015

MATAUPU: O SAULO

SINI: Ia a'oa'o le vasega ina ia malamalama, o Saulo, o le ulua'i tupu o Isaraelu.

TUSI FAITAU: 1 Samuelu 8: 5 – 7; 9: 15 – 17 (mo le Faiaoga)
1 Samuelu 9: 17 (mo le Vasega)

“Ua iloa mai Saulo e Samuelu, ona ta'u atu lea e le Alii ia te ia, Faauta, o le tagata lena na ou fai atu ai ia te oe, e pule o ia i lo'u nuu.”

FESOASOANI MO FAIAOGA:

O Saulo, o le atalii o Kiso i le nuu o Peniamina. Na saili e Saulo asini a lona tamā, ua oo atu iā Samuelu le perofeta a le Atua.

O Isaraelu le nuu o le Atua, ua latou fai atu iā Samuelu lo latou mana'o, ina ia avatu se tupu mo latou, e ta'ita'i ma faamasino i le nuu e pei foi o isi nuu. Ona tatalo ai lea o Samuelu i le Alii. Ona fetalai mai lea o le Atua iā Samuelu, inā ia usita'i i le upu a le nuu.

Na ta'u atu e le Alii i taliga o Samuelu, ua faapea, “E faapenei le itū aso taeao ou te auina ai iā te oe le tagata mai le nuu o Peniamina, e te faauu iā te ia e fai ma alii o lo'u nuu o Isaraelu; na te faaola foi i lo'u nuu nai lima o Filisitia.”

UIGA O UPU:

1. tagata vaai - perofeta a le Atua.

GALUEGA FAATINO:

Valivaligā Ata: Ia fai ni kopi o le ata ua saunia e tufa i le vasega e galulue ai.

PESE: 82 (Tusi Pese ma Viiga)
Avatu i le tupu

A'OA'OGA:

1. O Saulo le uluai tupu o Isaraelu.

ASO SA: 9 AOKUSO 2015
(ASO SA O TAMĀ)

MATAUPU: O SOLOMONA

SINI: Ia a'oa'o le vasega ina ia malamalama, o Solomona o le tupu o Isaraelu.

TUSI FAITAU: 1 Tupu 3: 7 15 (mo le Faiaoga)
1 Tupu 3: 12 (mo le Vasega)

“Faauta, ua ou faia e faapei ona e fai mai ai; faauta, ua ou foa'iina atu ia te oe le loto poto ma le matala.....”

FESOASOANI MO FAIAOGA:

O Solomona, o le atalii o Tavita le tupu ta'uta'ua o Isaraelu. Ina ua malia Tavita, ona avea lea o Solomona lona atalii e fai ma tupu o Isaraelu. O Solomona na fausia le malumalu i Ierusalema, lea ua ta'ua o le Fale o le Alii, po o le Mauga Paia o le Atua.

I le avea ai o Solomona ma tupu, sa le'i faalagolago i sona malosi ma sona iloa, ae sa tatalo i le Atua e foa'i mai le poto ma le loto matala, e ta'ita'iina ai le nuu ua telē na'ua.

E lei tatalo Solomona i se tamaoaiiga ma ni mamalu. Ae peitai, o ia mea uma na foa'i mai e le Atua ia Solomona. O le faailoga o le poto o Solomona, o lona tatalo lea i le Atua e fesoasoani mai a o feagai ma le ta'ita'iina o le malo. E leai se isi tupu i luma ma tua atu o Solomona e tutusa ma ia.

GALUEGA FAATINO:

Valivaligā Ata: Ia fai ni kopi o le ata ua saunia e tufa i le vaega e galulue ai.

TAULOTO: Ia a'oa'o le tauloto i le vasega

O le tama poto
E fiafia ai le tamā
A o le tama valea
E faanoanoa ai le tinā

A'OA'OGA:

1. Ia tatou tatalo i le Atua e foa'i mai le poto e pei o Solomona.

ASO SA: 16 AOKUSO 2015

MATAUPU: O IOPU

SINI: Ia a’oa’o le vasega ina ia malamalama, o Iopu le tagata onosai a o feagai ma ona ma’i.

TUSI FAITAU: Iopu 2: 7 – 11 (mo le Faiaoga)
Iopu 2: 7 (mo le Vasega)

“Ona alu ese ai lea o Satani i luma o le Alii, ma na faaoo ia Iopu le ma’i papala leaga, e gata a’e i ona alofivae, e gata ifo i lona tumua’i.”

FESOASOANI MO FAIAOGA:

Sa i le nuu o Usa le tasi tagata e igoa ia Iopu. Na sao lana amio ma le amiotonu, sa mata’u foi o ia i le Atua ma ‘alo’alo ese i mea leaga. Sa fanaua e ia ona atalii e toafitu ma afafine e toatolu. Sa tele foi ana lafu manu.

Sa faafuasei ona maua Iopu i le ma’i papala. E amata mai i lona tumua’i seia oo i ona alofivae. O le tamaoaiga ma lana fanau, na matuā faaumatia uma i le matagi tele. O ia faigata ma puapuagā na oo ia Iopu, e lei aveesea ai lona faatuatua ma lona loto onosai.

O le iuga, na toe malosi Iopu, ua te’a le mai papala sa ia te ia, ma ua toe maua foi isi ana fanau ma lona tamaoaiga ua sili atu nai lo mea sa i ai muamua.

Tamaiti, ia pei i tatou o Iopu na onosai pea i ona tigā, ae ‘aua nei maua loa tatou i ma’i o le tino, ona vave lea ona tatou liliu ese mai i le Atua, auā o ia e maua ai lo tatou fesoasoani.

GALUEGA FAATINO:

Valivaligā Ata: Ia fai ni kopi o le ata e tufa i le vasega e galulue ai.

PESE: A’e a’e i luga o mauga
Pupula mata o lou Agaga
A’e a’e i luga o mauga
Pupula mata faaleagaga
Liliu, liliu lou tua i leaga
Vaai le Atua i lugā
A’e a’e i luga o mauga
Outou ma a’u.

Climb climb up sunshine mountain
Heavenly breezes blow
Climb climb up sunshine mountain
Faces all aglow
Turn turn your back on evil
Look to God on high
Climb climb up sunshine mountain
You and I

A’OA’OGA:

1. Ia onosa’i i taimi faigatā e pei o Iopu.

ASO SA: 23 AOKUSO 2015

MATAUPU: O IEREMIA

SINI: Ia a’oa’o le vasega ina ia malamalama i le galuega a Ieremia

TUSI FAITAU: Ieremia 1: 1 – 9 (mo le Faiaoga)
Ieremia 1: 5 (mo le Vasega)

“Na au iloa oe a o le’i faia oe e a’u i le manava; na a’u faapaiaina oe a o lei fanau mai oe, na au tofia oe e fai ma perofeta i nuu.”

FESOASOANI MO FAIAOGA:

Na oo atu iā Ieremia le valaau a le Alii, ua faapea ane, “Na a’u iloa oe a o le’i faia oe e a’u i le manava, na a’u faapaiaina oe a o le’i fanau mai oe, na a’u tofia oe e fai ma perofeta i nuu.”

Ona tali atu lea o Ieremia i le Atua, “Aue! Le Alii e le Atua, ou te le iloa ona tautala, auā o a’u o le tama itiiti.” Ona fetalai lea o le Atua iā Ieremia, “Aua e te fefe, auā ou te lavea’i ia te oe.” Ona faaloaloa lea e le Alii o lona aao, ua pa’i i le gutu o Ieremia ma fetalai atu, ua ou tuuina atu a’u upu i lou gutu. Ua ou tofia oe e pule i nuu ma malo.

UIGA O UPU:

1. gataaga – faaiuga

GALUEGA FAATINO:

Valivaligā Ata: Ia fai ni kopi o le ata ua saunia e tufa i le vasega e galulue ai.

PESE: Faalagolago i aao o le Alii

A’OA’OGA FOU:

Ia tatou faalagolago i le Atua e manuia ai.

ASO SA: 30 AOKUSO 2015

MATAUPU: O SETEFANO

SINI: Ia a’oa’o le vasega ina ia malamalama, o Setefano o le tiakono lototele.

TUSI FAITAU: Galuega 7: 51 – 60 (mo le Faiaoga)
Galuega 7: 56 (mo le Vasega)

Ona fai atu lea, “Faauta, ua ou iloa le lagi ua avanoa, ma le Atalii o le tagata o lo o tu i le itū taumatau o le Atua.”

FESOASOANI MO FAIAOGA:

Na filifilia Setefano e fai ma tiakono e le au aposetolo. O le uiga o lona igoa, o le pale. E le gata o ia o le tiakono, ae ua na ia faia foi vavega faamalōlō i ē mama’i. Na inosia ma itagia o ia e tagata lutaia ona o lana galuega o le molimau atu o Keriso manumalo.

Ona fai atu lea o Setefano ia te i latou, “Faauta, ua ou iloa le lagi ua avanoa, ma le atalii o le tagata o lo o tu i le itu taumatau o le Atua.”

O lea na latou toso ai Setefano i tuāpa ma fetogi i ma’a. A ua valaau o ia, ua faapea, “Le Alii e Iesu, ia e talia mai lo’u nei agaga.” Ua to’otuli o ia ma alaga atu ma le leo tele, “Le Alii e, ‘aia e te tuuina atu lenei agasala ia te i latou. Ua uma atu lea upu, ona moe ai lea o ia.

GALUEGA FAATINO:

Valivaligā Ata: Ia fai ni kopi o le ata ua saunia e tufa i le vasega e galulue ai.

PESE: O lo’u Atua e alofa ia te au/My God loves me.

A’OA’OGA:

1. ‘Aua le fefe e talai le Tala Lelei ia Iesu Keriso.

SETEMA

MANATU TAIALA: SUIGA INA UA SALAMŌ

FAATOMUAGA:

Mo lenei masina o Setema, ua fia faamamafaina le manatu “SUIGA INA UA SALAMŌ” e fai ma taiala mo a tatou mataupu. O se manatu ma se lagona o lo o fia tulituliloaina, o le salamō faamaoni o le tagata mai le agasala, ma toe foi i le Atua e ala i lona faatuatua ma talitonu ma le faamaoni, ma faia lona finagalo.

ASO SA: 6 SETEMA 2015

MATAUPU: O LE MAMOE E TASI NA LEILOA

SINI: Ia a’oa’o le vasega ina ia malamalama, na fialia le leoleo mamoe ina ua toe maua lana mamoe e tasi na leiloa.

TUSI FAITAU: Luka 15: 3 – 7 (mo le Faiaoga)
Luka 15: 6 (mo le Vasega)

“A oo atu foi i lona aiga, ua faapotopoto ai ana uo ma e tuaoi ma ia, ua fai atu ia te i latou, Ia tatou olioli ia ma a’u; aua ua ou maua la’u mamoe na leiloa.”

FESOASOANI MO FAIAOGA:

O le to’atele o tagata i le vaitaimi na soifua ai Iesu i le lalolagi, e fai a latou lafu manu e pei o mamoe, povi ma oti. O mea ia sa tausia ai o latou aiga, ma sa faitauina ai lo latou tamaoaiga. O le ala lea ua faamatalaina ai e Iesu lenei faataoto iā te i latou, ina ia latou malamalama i ai.

O le tagata sa i ai lana lafu mamoe e selau, peita’i ua sē le mamoe e tasi ma ua leiloa. Ua avea lea tulaga ma ala ua tuuina ai e le leoleo mamoe ana mamoe e ivasefulu ma le iva, ae alu e saili mai le mamoe e tasi na sē. Ina ua maua le mamoe lea e tasi, ona ia faafuata ai lea ma le olioli. O lona uiga, ua si’i le mamoe i luga o lona tau’au, ma fusi mau i ai, ma toe foi mai i lona aiga ma le fialia tele. I le ua ia oo i lona aiga, ua potopoto ma ana uo, ma ua latou fialia faatasi ma ia, auā ua na ia toe maua lana mamoe e tasi na leiloa.

Tamaiti, fai mai le faataoto a Iesu, e faapea foi ona tele o le olioli a agelu o i le lagi i le tagata agasala e toatasi, e salamō ma toe foi mai i le Atua. O le alofa tunoa o le Atua, e faapei o le leoleo mamoe, ua na ia tuua le toatele, a ua saili mo le mamoe e tasi ua sē, ma le faamoemoe ina ia maua, ona faafuata ai lea ma le olioli, ma ua toe foi mai i le aiga.

GALUEGA FAATINO:

Fesili ma Tali

1. E fia le aofa’i o le lafu mamoe sa i ai?

Tali: E toaselau

2. E fia mamoe na leiloa?

Tali: E tasi

3. O le a le mea sa faia e le leoleo mamoe ina ua maua le mamoe e tasi?
Tali: Ua ia faafuata ma le olioli tele, ma ua toe foi mai i lona aiga.

VALIVALIGĀ ATA: Ia fai ni kopi o le ata ua saunia e tufa i le vasega e galulue ai.

PESE: Le leoleo mamoe lelei
Ua e alofa i au mamoe
Na te ave au i le vao mu'a
E fafaga ia te au
E ui lava ina ou savali
I le vanu o le oti
Na te saili mai
Faafuata ma le olioli.

A'OA'OGA FOU:

1. E saili mai pea le Atua mo i tatou ona o lona alofa tunoa
2. E tausī ma puipui i tatou e le Atua lo tatou leoleo mamoe sili.

ASO SA: 13 SETEMA 2015

MATAUPU: O LE TAMA UA SALAMŌ MONI

SINI: Ia a’oa’o le vasega ina ia malamalama, na salamō moni le tama, ma ua toe foi i lona aiga.

TUSI FAITAU: Luka 15: 11 – 31 (mo le Faiaoga)
Luka 15: 18 (mo le Vasega)

“O le a a’u tulai ma alu i lo’u tamā, ou te fai atu ia te ia, Lo’u tamā e, ua ou agasala i Le o i le lagi, atoa ma ou luma.”

FESOASOANI MO FAIAOGA:

Sa i ai se aiga o se tamā ma lana fanau tama e toalua. O se aiga fiafia ma manuia auā e tele a latou tupe, e i ai foi tagata faigaluega e faia a latou feau.

Ua alu le tama laititi ma lana vaegā tupe, ua tafafao ai ma ana uo. Ua so’ona fa’aalu ana tupe i tagata i mea e manana’o ai. Ua nofonofō solo i isi aiga, ma ua galo lava iā te ia si ona tamā ma lona aiga.

Peita’i, ina ua uma ana tupe, ua sosola foi ana uō na latou mafuta, ua mativa, ma ua leai se mea o totoe ia te ia. Ua aisi solo i le fia ai, ma ua leai se mea e nofo ai. Ona toe manatua vave lea e le tama lona tamā, ona mafaufau lea o le a toe foi i lona aiga moni.

Tamaiti, na matua’i fiafia lava le tamā, ina ua toe fo’i atu lona atalii i lo latou aiga. Ua momo’e mai, ma fusi mau si ona atalii, ma sogi atu i ai. Ioe, sa tumau pea le alofa o le tamā i lona atalii, e ui ina tele o lona sesē, ae ua ia toe lagonaina lona salamō ma le faamaoni, na ala ai ona toe foi mai i lona aiga. E faapenā le alofa o le Atua ia i tatou.

GALUEGA FAATINO:

1. Valivaligā Ata: Ia fai ni kopi o le ata ua saunia e tufa i le vasega e galulue ai.
2. PESE: A i ai Iesu i se aiga, o se aiga fiafia
With Jesus in a family, happy happy home

A’OA’OGA FOU:

1. Na talia fiafia e le tamā lona atalii ina ua toe fo’i mai i le latou aiga.
2. Ua lagona le salamō o le tama, ma ua suia ai le faanoanoa sa i ai i le fiafia.

ASO SA: 20 SETEMA 2015

MATAUPU: UA SALAMŌ SAKAIO

SINI: Ia a’oa’o le vasega ina ia malamalama na salamō Sakaio ina ua faafesaga’i ma Iesu.

TUSI FAITAU: Luka 19: 1 – 10 (mo le Faiaoga)
Luka 19: 8 (mo le Vasega)

A ua tu mai Sakaio, ua faapea mai i le Alii, “Faauta, le Alii e, o le a ou vaeluaina atu a’u mea i ē matitiva, afai foi ua ou ave mea a se tasi i se ala pepelo, ou te tuuina atu i ai e taifā.”

FESOASOANI MO FAIAOGA:

Sa i le aai o Ieriko le tasi tagata e igoa ia Sakaio. O ia o se tagata pu’upu’u ma sa’asa’a. O le ao lafoga sili i le malo o Roma, ae le gata i lea, o ia o se tagata mau’oa.

O le ui atu o Iesu i Ieriko, na faalogo ai Sakaio, o Iesu lea ua afio atu. Ua naunau tele Sakaio i le fia vaai ma feiloai ia Iesu. Peita’i, ona o ia o se tagata pu’upu’u tele, o lea na ia a’e ai i luga o le laau o le sukamoru, ma vaavaai ifo iā Iesu. Na iloa atu e Iesu Sakaio o lo o i luga o le laau o le sukamoru, ona ia fetalai atu lea i ai, “Sakaio e, ia e vave ifo nei i lalo, auā e tatau ona ou nofo i lou fale i le aso nei.”

Ua alu ifo i lalo Sakaio ma le fiafia tele, auā o lea o le a la ō ma Iesu i lona fale. Ua tupu le lē fiafia ma le muimui o le toatele o tagata ma latou faapea ane, “Ua alu Iesu i le fale o le tagata agasala e api ai.” Ona fai mai lea o Sakaio iā Iesu, “Le Alii e, o le a ou vaeluaina atu a’u mea i ē matitiva, afai foi ua ou ave mea a se tasi i se ala pepelo, ou te tau atu ai e taifā.” Ua fetalai Iesu ia te ia, “Ua oo mai le faaolataga i le aiga nei i le asō, ina ua fai o ia ma atalii o Aperaamo, auā ua sau le Atalii o le tagata e saili ma faaola i lē na leiloa.”

Tamaiti, o le feau tāua o le tatou mataupu i lenei aso, o le tagata agasala sa leaga ma lē alofagia e tagata, ua salamō ina ua faauō ma Iesu, ma suia ai lona olaga ma lana amio, ma ua avea ma tagata lelei, ma tagata talitonu faamaoni i le Atua.

UIGA O UPU:

atalii o Aperaamo - o le ta’u o le tagata faatuatua i le Atua.

GALUEGA FAATINO:

Fesili ma Tali

1. O ai na a’e i le laau?
Tali: O Sakaio
2. O le a le igoa o le laau na a’e ai Sakaio?
Tali: O le Sukamoru
3. Aiseā na a’e ai Sakaio i le laau?
Tali: O le fia matamata ia Iesu

4. O le a le galuega a Sakaio?

Tali: O le ao lafoga

5. O fea na o i ai Iesu ma Sakaio?

Tali: I le fale o Sakaio

PESE: “Sakaio o le tagata pu’upu’u”

A’OA’OGA:

1. Ua salamō Sakaio i ana mea leaga sa fai i tagata.
2. E alofa Iesu i so o se tagata.

ASO SA: 27 SETEMA 2015

MATAUPU: O LE LEPELA LOTO FAAFETAI

SINI: Ia a’oa’o le vasega ina ia malamalama, e le’i galo i le lepela na malōlō lona ma’i ona faafetai iā Iesu.

TUSI FAITAU: Luka 17: 11 – 19 (mo le Faiaoga)
Luka 17: 15 – 16 (mo le Vasega)

“O le tasi o i latou, ua na iloa ua faamalōlōina o ia, ona toe foi mai lea o ia, ua vivii atu i le Atua ma le leo tele; ua faapa’ū faō ia i ona vae, ua faafetai mai ia te ia.”

FESOASOANI MO FAIAOGA:

Na malaga atu Iesu i Ierusalem, ua ui atu i Samaria ma Kalilaia, ma oo atu i le tasi aai, ona fetai’i lea ma ia o tagata lepela e toasefulu, ua tutū mamao mai i latou.

Ua latou alalaga mai ma faapea mai ia Iesu, “Le Alii e, Iesu, ia e alofa mai iā te i matou.” Na silafia e Iesu lo latou mafatiaga, ona fetalai atu lea o Iesu ia te i latou, “Inā o ia, ia fa’aali atu outou i ositaulaga. Ua latou o, ona faamamāina lea o i latou.

Ua iloa e le to’atasi o i latou ua faamalōlōina, ona toe foi mai lea o ia, ua vivii atu i le Atua ma le leo tele; ua faapa’ū fao i vae o Iesu ma faafetai atu iā te Ia. Ona fetalai atu lea o Iesu, “E le’i faamamāina ea le to’atinoagafulu? A o ifea le to’aiva? Ua lē iloa ea ona toe fo’i mai e vivii atu i le Atua e pei o lenei tagata ese? Ona fetalai atu lea o Iesu iā te ia, “Inā tulai ia, ina alu, o lou faatuatua ua e malōlō ai.

Tamaiti, so o se tagata lava na te faia se mea lelei mo oe, ia ‘aia lava nei galo ona e faafetai i ai.

GALUEGA FAATINO:

Valivaliga Ata: Ia fai ni kopi o le ata e tufa i le vasega e galulue ai.

PESE: O Iesu o le tali/Jesus is the answer

A’OA’OGA:

1. Ia tatou iloa ona faafetai i le Atua mo mea uma.
2. E agalelei pea le Atua ia i tatou.

OKETOPA:

MANATU TAIALA: O SUIGA UA AUMAIA E TAMAITI

Ua filifilia le manatu taiala e pei ona ta'ua i luga e fa'aautu i ai mafaufauga o lenei masina ua faapitoa mo le fanau.

ASO SA: 1 OKETOPA 2015

TUSI FAITAU: Faataoto 20: 1 – 12
Faataoto 15: 1 – 20

FESOASOANI MO FAIAOGA:

Ua saunia le Tusi Faitau e pei ona ta'ua i luga e tapena ai le fanau mo le Lotu a Tamaiti. Ia tofu le tamaitiiti ma lana fuaiupu e a'o. A mae'a tauloto mai le tusi a Faataoto 20: 1 – 12, ona usuina lea o le pese ua ta'ua i lalo:

PESE: O o'u mata e lua e vaai ai i le Atua.
O o'u taliga e lua e faalogo i ana poloaiga
O o'u vae e lua e savali i ona ala
O o'u lima e lua e galue mo ia i aso uma.

Two little eyes to look to God
Two little ears to hear His words
Two little feet to walk in His way
Two hands to work for Him all of my days

Toe fa'aaauu ma faasolo tauloto mai le tusi a Faataoto 15: 1 – 20. A mae'a ona usu lea o le pese ua ta'ua i lalo;

PESE: Lautele pei o le vasa
Mauluga pei o le lagi i luga
Loloto, loloto pei o le sami loloto
E faapena le alofa o le Tamā
E ui ina ou faatauvaa
E tausia pea a'u e le Tamā
Fai mai le Tusi Sa
O lona alofa e sili lea.

Wide, wide as the ocean
High as the Heaven above
Deep, deep as the deepest sea
Is my Saviour's love
Although I'm not worthy
Still am a child of His care
For His word teaches me
That His love reaches me
Everywhere

A mae'a, ona usu lea o se pese vave fai taga e faauma ai tauloto a le Vasega Amata. Ia manuia tele tapenaga mo le aso o le fanau.

ASO SA: 25 OKETOPA 2015

MATAUPU: O IESU LE UŌ A TAMAITI

SINI: Ia a’oa’o le vasega ina ia malamalama, o Iesu o le uo a tamaiti.

TUSI FAITAU: Mareko 10: 13 – 16 (mo le Faiaoga)
Mareko 10: 14 (mo le Vasega)

A ua silafia e Iesu, ona tigā ai lea o lona finagalo, ua na fetalai atu foi ia te i latou, “Inā tu’u mai ia o tamaiti e o mai ia te a’u; ‘aua le vavao iā te i latou; auā e faapei o i latou nei o e o i le malo o le Atua.”

FESOASOANI MO FAIAOGA:

Ina ua maliu atu Iesu ma ona so’o i le laueleele o Iutaia i tala atu o Ioritana, na mulimuli atu ai foi ma le motu o tagata, ma faapotopoto ai ma i latou i lea mea. Ua toe a’oa’o atu Iesu ia te i latou e pei ona masani ai.

Ona latou aumaia lea o tamaiti iā te Ia ina ia pa’i ane ai o Ia, ma faamanuia iā te i latou. Peita’i ua o ane le au so’o o Iesu ma vavao i ē na latou aumaia. Ua silafia e Iesu le mea na faia e ona so’o, ona tigā ai lea o lona finagalo ma fetalai atu iā te i latou, “Inā tuu mai ia o tamaiti e o mai ia te a’u, ’aua le vavao iā te i latou; auā faapei o i latou nei e o i le malo o le Atua.

Tamaiti, o le a’oa’oga tāua o le tatou mataupu, e alofa faamaoni Iesu i tamaiti. E pei ona fa’aalia mai e Iesu; ua ia siitia tamaiti i ona lima, ua faaee ona aao i o latou luga, ma ua ia faamanuia iā te i latou. O le natura ma le uiga lelei o tamaiti, o le loto mamā, o le ola usiusita’i, o le ola faamaoni ma le ola talitonu. O mea uma ia e fiafia, ma alofa, ma fia fai uo ai Iesu i tamaiti, ma o uiga uma foi ia e maua e tagata uma e o i le malo o le Atua.

UIGA O UPU:

1. faamanuia - o folafolaga ua fai i se tagata ina ia i’u lelei ai lona olaga.
2. mālō o le Atua - o le mālō e maua ai le ola e faavavau. Na o tagata loto mamā e pei o tamaiti, ma e talitonu ma faatuatua i le Atua latou te oo i ai.

GALUEGA FAATINO:

Tala Faatino: Ia faatino le tala e le vasega.

PESE: E alofa Iesu i tamaiti
“Jesus loves the little children.

A’OA’OGA:

1. Na faamanuia Iesu i tamaiti.
2. O Iesu, o le uo a tamaiti.

NOVEMA

MANATU TAIALA: O LE OLA FOA'I (Suiga mai le manatu faapito i le loto alofa)

Ua filifilia lenei manatu taiala ina ia malamalama le fanau i a'oa'oga a le Tusi Paia e uiga i le faatinoga o le alofa. O le alofa e faamuamua ai isi tagata, a e 'aia le manatu faapito ia te oe ma lou aiga.

ASO SA: 1 NOVEMA 2015

MATAUPU: FAASOA FAALE-ATUA

SINI: Ia a'oa'oina le vasega ia malamalama le vasega i le faasoa a le Atua, e tutusa ai tagata uma, e pei ona faia e Tavita.

TUSI FAITAU: 1 Samuelu 30: 21 - 25 (mo le Faiaoga)
1 Samuelu 30: 24 (mo le Vasega)

“O ai foi se faalogo ia te outou i lenei mea? auā e tusa le vaegāoa o le na alu ifo i le taua ma le vaegāoa o lē na faamuli i oa, e faagatasi lava o latou vaegāoa.”

FESOASOANI MO FAIAOGA:

Ua foi mai Tavita ma ona tagata na faamalolosi e tuliloa Amaleka ua latou faoa a latou mea uma, ma 'ave o latou tagata. Ua toe maua mai mea uma, atoa ma ma mea a Amaleka ua latou faoa. Ua manatu Tavita, ana le seanoa le Atua na auai ma i latou, e lē manuia lo latou taumafai e lavea'i mai o latou tagata ma a latou mea totino.

Na i ai tagata na faavaivai i le palaai, na lē mafai ona faamalosi e o ma Tavita. O lea na fai mai isi tagata na o ma Tavita i le tuliloaga o Amaleka, ia 'aia ne'i faasoa atua mea ua maua ia te i latou. Tau lava o taitoalua ma fanau e faafoi i ai, ae 'aia le avatua i ai le oa.

Fai atu Tavita, “Ou uso e, 'aia le faapena ona fai i mea ua foa'i mai e le Alii iā te i tatou, ma na leoleo iā te i tatou, ma tuuina mai i o tatou lima le 'au na o mai iā te i tatou. O le mea lea e tutusa ai le vaegāoa o le na alu ifo i le taua ma le vaegāoa a lē na faamuli i oa. E gatasi uma tagata uma.

Ua fai foi ma tulafono ia Isaraelu e oo mai i le aso nei. E 'ese le lelei tamaiti o le faasoa a le tagata alofa. O le tagata e faalogo ma usita'i i le Atua, e faia lava mea sili mo isi tagata ma viia le Atua.

UIGA O UPU:

1. vete - o mea ua faoa mai i le isi itutaua.
2. vaegaoa - vaega o tupe ma oloa na maua.
3. faamuli - faatali atu.

GALUEGA FAATINO:

1. Valivaligā Ata: Fai ni kopi o le ata e tufa i le vasega e valivali.

PESE: Alofa o se mea ou te faasoa atu
Love is something that you give it away.

A'OA'OGA FOU:

1. 'Aua le faasoa manatu faapito.
2. Ia faasoa ma le alofa.

ASO SA: 08 NOVEMA 2015

MATAUPU: O LE FOA’I A IOSEFA LE AREMATAIA

SINI: Ia a’oa’o le vasega ina ia malamalama ia foa’i mea sili mo le Atua.

TUSI FAITAU: Mataio 27: 55 - 60 (mo le Faiaoga)
Mataio 27: 60 (mo le Vasega)

“Ua tuu ai i lona tuugamau fou na foa i le papa; ua fuli atu e ia le maa tele i le gutu o le tuugamau, ona alu ai lea o ia.”

FESOASOANI MO FAIAOGA:

E tulaga ‘ese lava le foa’i lenei a Iosefa le Aremataia mai le tele foa’i e tatou te masani ai.

O le tuugamau o Iosefa le Aremataia na foaina i le papa. O se galuega faigata le tau fausia o le tu’ugamau, auā o le papa e faigatā ona vaneina. E le taumate foi sona taugata tele. O le faamoemoe o Iosefa mo le tuugamau mo ia lava. E tanu ai o ia pe a oo mai le oti ia te ia. O le tagata e malamalama i le gasologa o le olaga, e iu tagata uma i le oti.

Ua le manatu Iosefa ia te ia pe a oo mai le oti. Ua mutimuti alofa o ia, i le vaai atu i lona Alii o le Alo o le Atua, ua puapuagaina ma tuulafoa’iina. Ua lē toe faasao ma faapolopolo mo ia le tuugamau a ua ia ofoina mo Iesu e fai ma ona malōlōga. O le mea e sili ona taua i le tagata, o le tuugamau o le nofoaga e malōlō tumau ai. E taua tele tamaiti lou alofa foa’i mo le isi tagata, aemaise le Atua.

UIGA O UPU:

- | | | | |
|----|-----|---|-------|
| 1. | foa | - | fau |
| 2. | au | - | afifi |

GALUEGA FAATINO:

1. Valivaligā Ata.

PESE: Lautele, lautele, e pei o le vasa
Wide, wide as the ocean.

A’OA’OGA FOU:

1. Ia foa’i mea sili mo le Atua.
2. Ia ‘aua le manatu faapito.

ASO SA 15 NOVEMA 2015

MATAUPU: O LE FOA'I ALOFA I Ē AGALEAGA MAI

SINI: Ia a'oa'o le vasega ina ia malamalama na alofa Elisaia ia Suria ua o mai e si'itaua mai iā Isaraelu.

TUSI FAITAU: 2 Tupu 6: 14 - 23 (mo le Faiaoga)
2 Tupu 6: 22 (mo le Vasega)

“Ona tali atu lea o ia, Aua e te fafasi; e te fasia ea i latou na e faatagataotauaina i lau pelu ma lau aufana? Ina laulau atu ia i o latou luma ni mea e ‘ai ma ni vai, latou te aai ma feinu ai, i le latou o ai i lo latou alii.”

FESOASOANI MO FAIAOGA:

Ua sii taua mai Suria ia Isaraelu, a ua leiloa e le tupu o Isaraelu. Auā ua latou fia fasioti ia Elisaia le perofeta, ona ua leai ma se mea faalilolilo a le tupu Suria e le iloa e Isaraelu. Auā o le perofeta o Elisaia ua na iloa mea uma ma na ia ta'u atu i le tupu.

Ua ala po le auauna a Elisaia, ma ua vaai atu ua siomia la'ua e le 'au tau toatele a Suria. Ona popole ai lea ma le fefe le auauna. A ua tatalo Elisaia i le Atua, ia faapupula mata o le faatuatua o lana auauna. Ua ia vaai ona lē toe fefe ai lea.

Ua toe tatalo Elisaia i le Atua, ina ia faatauasoina mata o le au tau a Suria. Ona oo mai lea o fitafita a Suria, ua fai atu le perofeta, mulimuli mai ia te a'u, ou te faasino atu le tagata ua outou sailia.

Ua oo atu i luma o le maota o le tupu o Isaraelu ona toe tatalo foi lea o Elisaia, e faapupula mata o le au tau a Suria. Ua pupula o latou mata, ona latou iloa ai lea ua latou i totonu o Samaria. Ua iloa e le tupu o Isaraelu, ona fai mai lea, a ou fasia ea? Ua fai atu le perofeta, 'Aua e te le'i faatoilaloina i latou. Ae ia e avane ni mea'ai e te fafaga ai i latou ma toe tu'uina atu e toe fo'i i lo latou alii.

Ua fafaga i meaai e tele ona toe foi ai lea ma le filemu. Ua tauai atu le fia tau mai i le alofa i le fafaga i meaai e tele.

UIGA O UPU

1. vagavagai - siosio
2. faatagataotauaina - ave faapagota

GALUEGA FAATINO:

1. Valivaligā Ata: Fai ni kopi o le ata valivali e tufa i le vasega e galulue ai.

PESE: Ua ou alu atu ia Satani e fao mai a'u meatotino

A'OA'OGA FOU:

1. Aua le tauai ma sui.
2. Ia alofa i taimi uma.

ASO SA: 22 NOVEMA 2015

MATAUPU: O LE FOA’I A LE FAFINE SUNEMA

SINI: Ia a’oa’o le vasega ia malamalama ua alofa le fafine Sunema ia Elisaia i lana galuega faaperofeta.

TUSI FAITAU: 2 Tupu 4: 8 – 13 (mo le Faiaoga)
2 Tupu 4: 10 (mo le Vasega)

“Ia ta faia se afeafe itiiti i luga e fai i le pa puipui o le fale; ia ta tuu ai se moega mo ia ma se laulau, ma se nofoa, ma se tuugālamepa; a sau foi o ia ia te i taua, i le alu ane i ai o ia.”

FESOASOANI MO FAIAOGA:

O le perofeta o Elisaia sa fealuai solo i Isaraelu atoa e ‘ave le feau a le Atua. E masani ona ui ane i Sunema i le ala o i ai le fale o le fafine sa’o tama’ita’i. Na tauanau ai e le fafine lenei le perofeta i se isi ana malaga, se’i malōlō ane i lona fale ua vevela le la. Ona afe ai lea o le perofeta ua malōlō ai. A ua fai ai ma masani a le perofeta o Elisaia le afe so’o i le fale o lenei fafine e malōlō ai.

Ua iloa e le fafine o le perofeta o Elisaia o le tagata o le Atua, lea e sau so’o iā te i la’ua ma lona to’alua. Ua fai atu ai le fafine i lona to’alua; Ia ta faia se afeafe po o se potu faaopoopo i luga e fai le pa puipui o le fale; ia tu’u ai se moega mo le perofeta ma se laulau, ma se nofoa ma se tuugalamepa, a sau ona alu ane lea e malōlō ai.

Ua toe sau le perofeta i le isi ana malaga, afe ane foi lea i le fale o le fafine Sunema, ma ua malōlō ai i lona afeafe ua uma ona fau e le fafine ma lona to’alua. Ua fai atu foi Elisaia i le fafine, “Faauta ua tigaina oe ona o nei mau sauniga uma, se a se mea e faia mo oe?”

Ioe, e lelei lou ola foa’i i tagata o le Atua, po o faifeau foi ma le lotu, auā e tauia uma mai lou tigaina e le Atua. O lenei fafine na ia fanauina se tama, na foa’i mai e le Atua. O le tau i lona ola foa’i i le tagata o le Atua.

UIGA O UPU

1. afeafe - potu o le fale.
2. tuugalamepa - o le mea e tu’u ai le moli
3. pulunaunau - tauanau faamalosi

GALUEGA FAATINO:

1. Valivaligā Ata.

PESE: O le alofa o le Atua e ofoofogia.

A’OA’OGA FOU:

1. Ia fiafia e atia’e le galuega a le Atua.
2. Ia fai sau foa’i mo le Ekalesia.

ASO SA: 29 NOVEMA 2015

MATAUPU: O ELIA MA LE FAFINE SAREFATA

SINI: Ia a’oa’o tamaiti i le foa’i a le fafine na faia i le tagata o le Atua.

TUSI FAITAU: 1 Tupu 17: 8 – 16 (mo le Faiaoga)
1 Tupu 17: 10 (mo le Vasega)

Ona tula’i lea o Ia ua alu i Sarefata, ua oo i le faitotoa o le aai, faauta, ua i ai le fafine ua oti lana tane, o lo o fai fafie; ona valaau lea o ia ia te ia, ua faapea atu, “Se’i e au mai sina vai itiiti i se ipu, so’u inu ai.”

FESOASOANO MO FAIAOGA:

Ua oo mai le afioga a le Alii i le perofeta o Elia; “Tulai ia, ma e alu i Salefata, le aai o Saitonu ma e nofo ai. Ua ou fai atu foi i le fafine ua oti lana tane na te tausii ia te oe.

Ona tulai lea o le perofeta ma ua alu i Salefata, ua ia vaaia foi se fafine o lo o fai fafie. Ona faapea atu lea i ai o ia sei e aumai lava sina ipu vai itiiti so’u inu ai. Ua alu o ia ua aumai, a ua toe fai atu foi o ia, se’i e aumai lava se fasi areto ma a’u.

Ona tali mai lea o le fafine, o lo o soifua lou Alii lou Atua, e leai se potoi areto ia te au, na o se luutaga o falaoa i le kate, ma sina suauu itiiti i le fagu. O lo o fai nei ni fafie se lua e tunu ai ma maua ma si au tama tane ma te aai ai, ona ma feoti ai lea.

Ona fai atu lea o Elia iā te ia, ‘aua e te fefe, alu ia ina e faia le mea na e fai mai ai. Ae muamua ona e fai o se potoi areto itiiti ma a’u, ae mulimuli ona faia lea ma oulua ma lau tama. Auā ua faapea ona fetalai mai ai le Alii le Atua o Isaraelu. E lē uma le kate falaoa e le faaitiitia foi le suauu i le fagu, seia oo i le aso e foa’iina mai ai e le Alii le ua i le laueleele.

Ona alu ai lea o le fafine ua fai e tusa ma le upu a Elia, ua latou aai foi ma Elia ma lona aiga i aso e tele. Ua le uma le falaoa i le kate, sa le faaitiitia foi le suauu i le fagu, e tusa ma le Afioga a le Alii na oo ia Elia.

UIGA O UPU

1. ua - timu
2. luutaga - lu’uga i le lima
4. kate - tanoa

GALUEGA FAATINO:

Valivaliga Ata

PESE: Suauu lau lamepa ia mu pea
Give me oil in my lamp. Give me burning

A’OA’OGA:

1. Ia faalogo ma usita’i.
2. Ia lima foa’i.

**MANATU TAIALA O TESEMA: O LE KERISIMASI
(Suiga mai i le pogisa i le malamalama)**

O le manatu taiala o lenei masina “O LE KERISIMASI”. O le valoia lea o le oo mai o le malamalama o le Atua i le lalolagi, aemaise o le faaolataga mo tagata uma.

ASO SA: 6 TESEMA 2015

MATAUPU: O LE POGISA MA LE MALULU

SINI: Ia a’oa’o le vasega ina ia malamalama o le po pogisa ma le malulu na fanau ai Iesu

TUSI FAITAU: Luka 2: 1 – 15 (mo le faiaoga)
Luka 2: 7 (mo le vasega)

“Ua fanau e ia lana tama ulumatua, ua ia aui ia te ia i le ie, ma faataoto ia te ia i le fale manu, auā latou te le ofi i le fale e tali ai malo”

FESOASOANI MO FAIAOGA:

Na o mai Iosefa ma Maria i le tusiga igoa i Peteleema. Ae o Maria, o lo o to o ia, o le vaitaimi tonu lea, o le a fanau mai ai le Alii Faaola

Na saili e Iosefa se fale e fanau ai Maria, peita’i ua leai ma se fale tali malo o avanoa, ua na o le fale o manu, ma ua la nonofo ai loa. Ua fanau mai e Maria se tama meamea, ma ua ia aui o ia i le ie, ma faataoto i le fale o manu. Na fanau mai Iesu i le pogisa ma le malulu.

Ua faalogo le au leoleo mamoe sa i le vao i lea po ua fanau Iesu, ona latou o loa lea e saili i le pepe fou. Tigā le pogisa ma le malulu o lea po, ae sa saili lava le au makoi le mea o fanau ai le pepe fou, ma ave i ai a latou meaalofa

Ioe tamaiti, na fanau mai Iesu i le fale o manu, i le pogisa ma le malulu; E ese le faatauvaa o le nofoaga na fanau ai Iesu „,a ea tamaiti?...

GALUEGA FAATINO:

1. Valivaliga Ata: Ia fai ni kopi o le ata ua saunia ma tufa atu i le vasega e galulue ai.
2. A’oa’o pese o le Kerisimasi

PESE: Silent night

A’OA’OGA:

1. O le ola i se auala maualalo e faaeaina ai oe.
2. Talia ma le fiafia se meaalofa ua e maua.
3. Na fanau Iesu i le pogisa ma le malulu.

ASO SA: 13 TESEMA 2015

MATAUPU: LE MALAMALAMA O LE FALE O MANU

SINI: Ia a’oa’o le vasega ina ia malamalama o le fetu na taitai le au makoi, i le fale o manu na fanau ai Iesu

TUSI FAITAU: Mataio 2: 1 – 12 (mo le faiaoga)
Mataio 2: 10 (mo le vasega)

“Ua latou iloa le fetu, ona matuā tele ai lea o lo latou fiafia.”

FESOASOANI MO FAIAOGA:

O leni taeao, o le a faamatalaina ai le fanau mai ai o Iesu i le lalolagi. Na iloa loa e le au makoi le fetu i le itu sasae o Ieruselema, alu loa ma le latou faiga malaga e saili i le pepe fou.

Na muamua ona feiloai ma le tupu o Herota, ma sa faailoa i ai e makoi le autu o le latou malaga. Sa naunau foi le tupu e fia feiloai i le pepe, e ui ina o se manao leaga ia fasiotia ai Iesu, ma sa ia faapea ai, “A outou iloa o ia ia faailoa mai ia te a’u”. Sa alu loa le malaga a le au makoi, e saili po o fea tonu o fanau ai le pepe fou.

Ua taitai e le fetu le au makoi i le nofoaga o lo o fanau ai Iesu, ua lagona e le au makoi lo latou fiafia, auā o lea ua avea le fetu mo a latou taitala.

Na o malaga lava Makoi ma le naunau, e fia taunuu i le mea o lo o i ai le fetu. Ua oo atu le au makoi i le fale o manu sa fanau ai le pepe fou, ua ulufale atu le au makoi, peita’i na latou vaaia ai le tamaititi, o lo o taoto mai ai, o lo o aui i le ie, ona faapa’uū ai lea ma ifo atu ia te ia, ua talai foi a latou oloa ma avatu ai meaalofoa, o le auro, pulu lipano ma le pulu muro.

GALUEGA FAATINO:

1. Saunia ni ata: Ata o Iosefa ma Maria ma le pepe fou o lo o i totonu o le fale manu.
2. Valivali ata ma faaigoa mai: Iosefa, Maria, Iesu, Au makoi

PESE: Na fanau mai o Iesu

A’OA’OGA:

1. Fai sau meaalofoa mo le pepe fou.
2. O le fetu na taitai i le au makoi i le fale o manu, na fanau ai Iesu.